



Аллоҳ кимни яхши кўради?

Тиник ойна

Бир куни Пайғамбаримиз Мұхаммад соллаллоҳу алайҳи ва салламнинг олдилариға Абу Жаҳл келиб:

- Бани Ҳошим уруғидаги ҳеч бир одам кўзимга сендан хунукроқ кўринмайди,
- деди.

Расули акрам алайҳиссалом:

- *Тўғри айтдинг*, – дедилар.

Шу пайт ҳазрат Абу Бакр розийаллоҳу анҳу келиб қолди ва:

– Ё Расулуллоҳ, юзингиз қуёшдек ёрқин. Бу оламда сизнинг юзингиздан гўзалроқ ўзни кўрмадим, – деди.

Сарвари коинот унга ҳам:

- *Тўғри айтдинг*, – деб жавоб қайтардилар.

Саҳобалар Расулуллоҳ соллаллоҳу алайҳи ва салламдан бу бир хил жавобнинг ҳикматини сўрашди. Шунда у зот:

– *Мен Аллоҳ жилолаган бир ойнаман, менга қараган киши ўзини кўради*, – деб жавоб бердилар.

Қалб ва гўзалик

Ривоят қилишларича, бир подшоҳ Лайлиниң унчалик ҳам гўзал эмаслигини кўриб, Қайс унинг нимасига бу қадар шайдо (Мажнун) бўлганига ҳайрон қолганида, вазири: “Шоҳим, сиз Лайлига Қайснинг кўзи билан қарай олмагансиз.

Йўқса, бундай демаган бўлардингиз”, деб насиҳат қиласи. Демак, гўзаликни кўра билиш учун кишининг қалби салим ва пок бўлмоғи лозим. Акс ҳолда, ўзининг гуноҳлардан қорайган қалбини кўради, холос.

Нима билан машғулсиз?

Аллоҳ таоло қайси бандасини яхши кўришини қандай билса бўлади?

Баъзилар Аллоҳ таоло бандани суйишини унга берилган бойлик билан ўлчайди. Баъзилар эса Аллоҳ фақирларни яхши кўради, шу боис уларнинг ҳисобини осон қилиш учун кам мол-мулк берган, дейишиди.

Уламолар айтадилар: “Нима билан машғул қилиб қўйилгансиз? Шунга қараб Аллоҳ сизни яхши кўрадими, йўқми – билиб олаверасиз. Агар жамиятга фойдасиз ишлар билан овуниб юрган бўлсангиз, демак, Аллоҳдан узоқлашибисиз. Аксинча, хайрли, савобли, икки оламда сиз ва бошқаларга фойдаси тегадиган ишларни қилиб юрган бўлсангиз, унда билингки, Аллоҳ сизни суюкли бандалари қаторига кўшибди.

*Навбаҳор тумани “Арабхона катта”
жоме масжиди имом ноиби
Ҳазрат ИСМОИЛ тайёрлади.*

Нажом – намозда

Кўпчилигимиз ёмон одатлардан қутулиш учун турли чоралар ахтарамиз. Иллатлардан халос бўлиш учун ҳар хил усулларни қўллаймиз. Лекин буларнинг уддасидан, ҳарчанд уринсакда, чиқа олмай оворамиз.

Аллоҳ таоло Куръони каримда марҳамат қиласи: “Албатта, намоз фаҳш ва ёмон ишлардан қайтарур” (Анкабут сураси, 45-оят).

Барча шартларига риоя қилиб, хушува хузу билан ўқилган намоз намозхонни фаҳш ва ёмон ишлардан қайтаради.

Ишхонада бирор айб иш қилиб қўйисак, раҳбарнинг юзига қарашга уяламиз. Оилада фарзанд қилган ножӯя иши туфайли ота-онасидан ҳайиқади. Худди шундай биз бирор айб иш қилсан, ҳар куни беш маҳал ҳузурида турадиган Раббимиздан ҳаё қиласиз. Шу боис намозлар орасида, умуман, ҳар доим фаҳш ва ёмон ишлардан узоқ бўлишга интиламиш.

Имом Абу Олия айтади: «Албатта, намознинг уч дўсти бор. Қайси намозда ушбу уч дўст топилмас экан, унинг маъноди қолмайди. Улар: ихлос, хавф ва Аллоҳнинг зикридир. Ихлос яхшиликка буюради, хавф ёмонликдан қайтаради ва Аллоҳнинг зикри Куръонга буюради» («Тафсир ибн Абу Хотим»).

Қуёш билан мусобақалашгандек, тонг отмасдан уйғониб, покланиб, Аллоҳга ибодат қилиш, зикр ва тасбехлар айтиш, илтижолар қилиш қанчалик завқли-мароқли... **БОМДОД** вақтининг ифорини туйишнинг гашти бўлакча... Бундай ибодат ёлғончи ва ўткинчи дунёга қарши кийилган мустаҳкам зирхdir.

Куннинг серташвиш онларида, яъни **ПЕШИН** вақтида тирикчиликни бироз четга суриб, Набий алайҳиссалом “Кўзимнинг нури” (Имом Насоий ривояти) ва “Диннинг устуни” (Имом

Дайламий ривояти), дея таърифлаган намоз сари чоғланамиз. Ибодатни адо этгач, ич-ичимииздан рухий енгиллик туямиз.

Дунё ҳаётининг бир кунлик йўлида АСР намози тайин этилган “бекат”ида тўхтаб, яна бироз тин оламиз-да, ожиз банда эканлигимизни, “Дунёда гўё ғариф ва йўловчи каби бўлишимиз” (Имом Бухорий ривояти)ни эсга олиб, Ҳақ таолодан абадий саодатни умид қилиб, муножот айлаймиз.

Қош қорайгач, яна ихлос билан қиблага юзланамиз. Қуёш ботиши билан кундузимиз ҳам поёнига етиши, вақти-соати келиб, умримиз ҳам ниҳояланишини эслаб, **ШОМ** намозига киришамиз.

Кундузи билан бирга дунё ҳам тун бағрига гарқ бўлган онларда, ўлимнинг рамзи бўлган уйкуга ётишдан олдин яна бир бор жойнамоз устида туриб, **ХУФТОН** намозини адо этамиз. Хуфтонни ўқиб бўлгач, кунлик ҳисобот топширгандек кун давомида билиб-бilmай қилган гуноҳларимиз учун истигфор айтиб, чарвоқларни унугиб, меҳрибон ва раҳмли Раббимизнинг раҳмат уммонига чўмган ҳолда шукроналар айтамиз.

Бир кунда барчаси жамланса, бир соатдан ошмайдиган, инсонга ҳузур-ҳаловат, хотиржамлик, ором ва оройиш берадиган энг мукаммал чора бу – **НАМОЗ**.

Аллоҳ таоло: “Огоҳ бўлингизки, Аллоҳни зикр этиш билан қалблар ором олур (ва таскин топур)” (Раъд сураси, 28-оят), деб марҳамат қилган.

Намоз ўқиган одам руҳан тетик бўлади, руҳан тетик бўлган одам ҳар қандай ташвишу муаммони ҳеч қийинчиликсиз енгиб ўта олади.

Нобель мукофоти лауреати, инглиз ёзувчиси Бернард Шоу: “Мусулмонларнинг намози 2000 йилларга келиб дунёдаги энг машхур профессор-шифокорларнинг рецептидан жой олади...” деган эди.

Ҳа, ихлос билан ўқилган намоз нафақат инсоннинг охирати учун, балки соғлиги, руҳияти учун ҳам кони фойдадир.

Толибжон НИЗОМ
тайёрлади.

Мундарижаса



Насиҳат

Аллоҳ кимни яхши күради? 1

Убудият

Нажот – намозда 2

Тағсир

Иймон билан әргашгандарга хушхабар 4

Мазҳабсизлик – ҳатарли бидъат

Имоми Аъзам – улуғ мұхаддис 6

Тадқиқот

Ким чиройлироқ бўлган? 8

Қуръон мўъжизалари

Коинот чексизми? 9

Ҳадис шарҳи

Ризқнинг сабабларидан бири 10

Яхшилар ёди

Сайд Ҳошимхон ибн Сайд Ғозихон 11

Саҳобалар ҳаёти

Мұсҳафни жамлаган зотлардан
бири 12

Масала

Сўраган эдингиз... 14

Қуръон қиссалари

Митти чивин билан ҳалок қилинди 16

Мозийдан сабоқ

Ҳақ әгасига қайтарилади 17

Дунёдан дараклар

Ислом ва олам 18

Маънавий мерос

Шайх Хованд Тоҳур асарларида
ижтимоий масалалар 20

Тафаккур

Мўъжизалар гулдастаси 21

Маънавиятимиз меъморлари

Тарбия ҳақидаги улуғ китоб 22

Қуръонни ўрганамиз

Қироат услубларининг фарқли
жиҳатлари 24

Улуғларимиз

Дунё тан олган мутафаккир 25

Шеърият

Ўзингдан бир сифат устун
билин юр... 26

Саодат асрига саёҳат

Бадр ғазоти 28

Bolajonlar sahifasi

Qarg'aning nasibasi 31

Минтақа

Фижилик
мусулмонлар 32



بِسْمِ اللَّهِ الرَّحْمَنِ الرَّحِيمِ

وَالَّذِينَ آمَنُوا وَاتَّبَعُتُهُمْ ذُرِّيَّتُهُمْ بِإِيمَانِ الْحَقِّنَا بِهِمْ ذُرِّيَّتُهُمْ وَمَا أَلَّتَهُمْ مِنْ
عَمَلِهِمْ مِنْ شَيْءٍ كُلُّ امْرِئٍ بِمَا كَسَبَ رَهِينٌ ﴿٢١﴾

«Үзлари иймон келтириб, зурриётлари ҳам уларга иймон билан эргашган зотларга (ўша) зурриётларини ҳам қўшамиз. Уларга қилган амалларидан бирор нарсани камайтирмаймиз. Ҳар бир кимса ўзи қилган иши билан гаровлангандир» (Тур сураси, 21-оят).

Иймон билан эргашганларга ҳушхабар

Ушбу ояти карима тафсири ҳақида буюк муфассир Абдуллоҳ ибн Аббос розийаллоҳу анҳумодан тўртта ривоят келтирилган.

Биринчи ривоят. “Албатта, Аллоҳ таоло мўмин бандасининг кўзи қувнаши учун унинг зурриётини ўзи билан бирга жаннатдаги даражасини қўтаради, гарчи зурриётининг амали у даражага етмаса ҳам” (“Тафсири Ибн Касир”).

Иккинчи ривоят. “Албатта, Аллоҳ таоло мўмин кишига иймон даражасига етмаган ёш зурриётини қўшиб қўяди” (“Тафсири Куртубий”).

Вояга етмай вафот этган болалар ўзларидан аввал ўтган аждодлари ора-

сидан ким жаннатга тушган бўлса, уни ана шуларнинг ёнига жойлаб қўяди, гарчи савоби бўлмаса ҳам. Бу Аллоҳнинг марҳаматидир.

Учинчи ривоят. Абдуллоҳ ибн Аббос розийаллоҳу анҳумо айтади: «Ояти каримадаги “иймон келтирганлар”дан мурод муҳожир ва ансорлардир. “Зурриёт”дан мурод тобеинлардир».

Албатта, Расулуллоҳ соллаллоҳу алайҳи ва саллам билан Мадинаға ҳижрат қилганлар ва Аллоҳ розилиги учун муҳожирларга молу жонлари билан ёрдам қилганлар иймонда пешқадам зотлардир. Кейинги авлод – тобеинлар эса Исломнинг кенг ёйилишида саҳобаларга эргашганлар.

Тўртинчи ривоят. Расулуллоҳ соллаллоҳу алайҳи ва саллам: «Жаннат аҳли жаннатга кирса, улардан бири ота-онаси, аёли ва фарзандлари ҳақида сўрайди. Унга жавоб берилади: “Уларнинг даражаси сен етган даражага етмади”. Шунда у айтади: “Эй Раббим, мен ўзим учун ҳам, улар учун ҳам амал қилганман-ку?” Шунда



Аллоҳ таоло буюради: "Уларни бу солиҳ бандага қўшиб қўйинглар» ("Тафсири Куртубий").

Дарҳақиқат, ота-оналар, оила бошлиқлари фарзандларига гўзал таълим-тарбия, одоб-ахлоқ берсаларгина, фарзандлар Аллоҳ таолонинг фазлига эришадилар. Шунингдек, фарзандлар ҳам вафот этиб кетган ота-оналарининг ҳақларига хайрли дуолар қилсалар, солиҳ амалларни мунтазам равишда қилиб борсалар, марҳумлар Раббимизнинг иноятига лойик бўлади.

Расулуллоҳ соллаллоҳу алайҳи ва саллам марҳамат қилганлар: «*Албатта, Аллоҳ таоло жаннатда солиҳ банданинг даражасини қўтаради. У: "Эй Рabbim, менга берилган бу лутф нимадан?" деб сўрайди. Шунда унга: "Фарзандларинг сенинг ҳақ-қингга қилаётган хайрли дуолари, истиғфорлари натижасидир", дейилади» ("Тафсири Куртубий").*

Олтинхон Тўра Тарозий тафсирида бундай дейилган: «Иймон келтирган бандаларнинг мўмин зурриётлари ота-оналарининг йўлидан юришса, улар охирига етказа олмаган ишларни поёнига етказишса, гарчи ўзларининг амаллари ва аҳволлари ота-оналарининг даражасига етмаган бўлса-да, улар ҳам Аллоҳ таолонинг фазлу карами билан пешволоварга қўшилади. Пешволоварнинг савоби олиниб, уларга берилмайди. Бу Аллоҳ таолонинг икромидир».

Мазкур оятда ота-оналар иймоннинг барча шартларини бажариб, эътиқодда мустаҳкам ҳолда авлодларини ортларидан эргаштирсалар, охиратда неъматлар мукаммал бўлиши учун улар билан бирга зурриётлари ҳам жаннатга киритилиши баён этилди.

Бола улғаяр экан, ҳамма нарсани атрофидаги катталардан, хусусан, оила бошлиқларидан ўрганади. Ёши улуғлардан ибрат олади, уларга тақлид қилиб, ҳаёт тажрибаларини ўзлаштиради. Ота-она қўпол ва ёмон хулқли бўлса, бола ҳам шундай вояга етади. Ота-она ҳаромдан парҳез

қилса, хайрли ишларнинг бошини тутса, фарзанд ҳам олийжаноб инсон бўлиб камолга етади.

“Ҳар бир киши қилган амали билан гаровланган” ояти маъноси ҳақида Ибн Аббос розийаллоҳу анхумо: “Дўзах аҳли ўзларининг гуноҳ амалларига боғланиб қолади. Жаннат аҳли эса ўзларининг неъматларига етиб борадилар”, деган. Бу ҳақда Аллоҳ таоло Муддассир сурасининг 38-40-оятларида марҳамат қилган:

“Ҳар бир жон ўзи (дунёда) қилган (яхши ва ёмон) амали билан гаровлидир. Фақат ўнг томон эгаларигина жаннатларда бир-бирлари билан савол-жавоб қилурлар”.

Мазкур оят мазмунидан шу нарса аён бўладики, агар фарзандлар иймон ва Исломда аждодларига эргашсалар, барчалари жаннат неъматларидан биргаликда баҳраманд бўладилар.

Ота-онанинг вазифаси фақат фарзандни дунёга келтиришдан иборат эмас. Улар жигарпораларини ақлли, эсли-хушли, жисмонан соғлом, диёнатли, эътиқодли, жамият ва миллатга фойдаси тегадиган инсонлар қилиб тарбиялаш ҳақида қайғуришлари керак (“Тафсири Ҳилол”).

* * *

Қоронғи тунда ота ва бола сафарга чиқди. Мехрибон ота боласининг нотўғри қадам босиб тойилиши, йиқилиб шикаст этишидан қўрқиб олдинда борар эди. Ота бот-бот: “Болам, эҳтиёт бўлгин! Сув, лойни босмагин, қоқилиб кетмагин, чуқурга қадам қўймагин!” дер эди. Бола: “Отажон, хавотир олманг, сиз қаерга қадам қўяётган бўлсангиз, ўша жойдан, изингиздан юраман. Агар сиз қоқилмасангиз, мен ҳам қоқилмайман”, дер эди.

Хулоса шу: Оталар тўғри йўлни танласалар, фарзандлар ҳам уларга эргашадилар.

*Тафсир китоблари асосида
“Убай ибн Каъб” жоме
масжиди имом-хатиби
Наврӯзжон ТЕМИРОВ
тайёрлади.*

ИМОМИ АЪЗАМ –



Бузғунчи тоифалар, жумладан, соҳта салафийлар Имоми Аъзам раҳматуллоҳи алайҳни кам ҳадис билган, дея айблаб, у кишига таъна ва маломат тошларини отадилар. Пайғамбаримиз соллаллоҳу алайҳи ва салламдан 124 та ҳадис ривоят қилган буюк саҳоба Абу Бақр розийаллоҳу анҳуни энг кўп ҳадис ривоят қилган (5374 та) Абу Ҳурайра розийаллоҳу анҳуга нисбатан кам ҳадис билган дея оламизми?

“Ал-ҳадис вал муҳаддисун” китобида Мұхаммад Маҳмуд Ҳоразмий айтади: «Шомда Имоми Аъзамнинг мақомларини билмаган жоҳилларнинг у зотга нисбатан “оз ҳадис билади”, деган сўзларини эшитдим. Бу гап менинг ҳамиятимни қўзғади. Имоми Аъзам ривоят қилган ҳадисларни уламолар ўн беш муснадга жамлашган».

Абу Ҳанифа раҳимаҳуллоҳ ҳадис илмида ўз замонасида пешқадам бўлиб: «Модомики одамлар орасида ҳадис талабида юрганлар бор экан, улар яхшилиқда бардавом бўладилар. Агар илмни ҳадиссиз талаб қилгудек бўлсалар, барбод бўладилар», «Аллоҳнинг динида ўз раъйингиз билан асло бир сўз айта қўрманг. Суннатга эргашинг, чунки ким суннатдан чет-

га чиқса, адашади», деган¹. Демак, суннатни муҳофаза қилиш залолатдан сақланиш учун лозим бўлган қоидадир.

Ровий ёдлаган ҳадисини одамларга етказиши ва событ бўлиши учун Имом Абу Ҳанифа қўйган муҳим шарт: «Ровий ўз ҳадисини шайхидан таҳаммул қилган вақтидан то уни адо этгунича, орада ҳеч қандай унтишсиз сақлаб қолиши лозим»². Бунинг учун мустаҳкам хотира талаб этилади.

Имоми Аъзам раҳимаҳуллоҳнинг яна бир шарти бор. Бу шартнинг аҳамиятли эканини унга амал қилган кишигина билади. У ҳам бўлса: «Ҳадиснинг маъноси билан ровий лафзлар устида қилаётган тасарруфининг натижаси қандайлигини билиши учун у фақих бўлиши лозим»³ деган шартдир. Албатта, ҳадис илмида фақих бўлиш илмий омонатдорлик шартидир.

Абдулғаффор Үюнус Суд Ҳимсий Ҳанафий раҳимаҳуллоҳ бундай деган: «Ҳозирги кунда илмга берилган ва ғууррга кетган кўпгина “олим”чалар ўзларини Сурайё юлдузига чиқдим деб ўйлашяпти. Аслида улар чуқур жарликка қулашади. Олти саҳих ҳадис китобидан бирини мутолаа қиласди-да, Абу Ҳанифанинг мазҳабига хилоф бир ҳадисни кўрган ондаёқ: “Абу Ҳанифа мазҳабини деворга уриб, Расулуллоҳ соллаллоҳу алайҳи ва салламнинг ҳадисларини олинг!” дейди. Лекин у ҳадис мансух бўлгани ёки ундан кўра санади кучлироқ ҳадис борлиги боис унга амал қиласликни лозим қиласдиган далиллар борлигини билмайди. Ҳадисга амал қилиш шундай нодонларга топширилса, илмга хиёнат содир бўлиб, ўзлари ҳам адашади, бошқаларни ҳам адаштиради». Албатта, шошқалоқлик ҳар бир ишда ноқисликни келтириб чиқарганидек, илмда ҳам



улуғ муҳаддис

гуноҳи кабира даражасида тойилиш ҳосил қиласди.

Абу Муҳаммад Абдуллоҳ ибн Ваҳб Мисрий бундай деган: “Ҳадис уламолардан бошқаларни адаштиради!” Зоро, ҳамма ҳам ҳадис илмида фақиҳ бўла олмайди ва ҳадисдан хукм чиқариш фақиҳларга юкланди. Муҳаддис фақиҳ бўлиши, қувватли ва ишончли фақиҳ эса албатта закий ва омонатдор муҳаддис бўлиши лозим.

Яхё ибн Наср айтади: «Абу Ҳанифанинг ҳузурига кирдим. Уй тўла китоб эди. Унга: “Булар нима?” дедим. У: “Буларнинг барчаси ҳадислар. Буларнинг фақат фойда олинадиганини ривоят қилдим, холос”, деди». Зоро, инжулар учун фойда берадиган жой ва замон топиш моҳир “заргар”га хосдир.

Аллома Али Қори “Маноқиб”ида Муҳаммад ибн Самоъадан қўйидагини нақл қиласди: «Абу Ҳанифа раҳимахуллоҳ етмиш мингдан ортиқ ҳадис зикр қилган . “Ал-Осор”ни қирқ минг ҳадисдан танлаб олган».

Абдуллоҳ ибн Фарруҳ фиқҳда ироқликларнинг услубидан таъсирланган, И мом Абу Ҳанифадан ўн мингга яқин масала ёзиб олган. Абдуллоҳ ибн Фарруҳ айтади: «Абу Ҳанифанинг ҳузурида эдим. Уйининг юқорисидан бир ғишт тушиш оқибатида бошим ёрилди. Шунда у: “Танла, агар хоҳласанг, жароҳатингнинг товонини тўлайман, хоҳласанг, уч юзта ҳадис айтиб бераман”, деди. “Менга ҳадис яхши, уч юзта ҳадисни айтиб бера қолинг”, дедим». Ҳадис илмига бўлган муҳаббат ҳар қандай жароҳатни, хусусан, маънавий жароҳатни даволайди.

И мом Аҳмад раҳимахуллоҳнинг: “Ким тўрут юз минг ҳадис ёд олса, ижтиҳод ва фатвога салоҳиятли бўлиши мумкин”, деган гапи Ибн Маъиннинг бу борада “беш юз минг ҳадис”, деганидан кейинроқ келади.

И моми Аъзам раҳматуллоҳи алайҳнинг замондошлари ва кейинги уламолар у зотнинг фақиҳ ва мужтаҳид эканини эътироф этган. Ҳатто: “Одамларнинг барчаси фиқҳ борасида Абу Ҳанифанинг илмига тобедир”, ҳам дейилган. Бунинг маъноси шу: “Абу Ҳанифа

мужтаҳидга лойиқ равища ўша ададдаги ҳадисларни, балки ундан ҳам қўпини жамлаган!”⁴

Абу Ҳанифа раҳматуллоҳи алайҳ тобеинлар ва табаа тобеинлар даврида яшаган. Ўша даврда Китоб, суннат ва салафи солиҳларнинг сўзларини яхши билган одам ҳақиқий олим ҳисобланган. Бу жараён табиий воқеликлар натижаси эди.

И моми Аъзам раҳматуллоҳи алайҳнинг фиқҳий фатволари, таълиф қилган китоблари у зотнинг ҳадис илмида ҳофиз бўлганларига далолат қиласди⁵. Ақл ва инсоф эгалари шундай хулоса қилганлар.

И мом Абу Юсуф айтади: “Қачон бир масалада Абу Ҳанифа раҳматуллоҳи алайҳга хилоф қилсан, ана шу масала борасида изланиб кўрардим ва устозимнинг ўша масалада айтигандан фатволари охиратда нажот берувчи экани маълум бўлди. Гоҳида мен бир ҳадисни саҳиҳ деб унга мойил бўлардим. Кейин билсан, Абу Ҳанифа раҳматуллоҳи алайҳ ўша ҳадиснинг саҳиҳлигини мендан кўра яхшироқ билар экан”⁶.

Ҳадисни билиб туриб, унинг фиқҳини тушунмаслик муҳаддисларни нокулай аҳволга солиб қўяди.

Ҳатиб Бағдодий И мом Абу Ҳанифа раҳматуллоҳи алайҳдан: “Агар фақиҳлар Аллоҳнинг валийлари бўлмаса, демак, Аллоҳнинг валийси йўқ экан”, деган сўзни ривоят қилган.

Мужтаҳид аллома И моми Аъзам раҳимахуллоҳ мураккаб синовлардан, мунозараю баҳслардан шараф билан ўтиб, буюк имом номига сазовор бўлди.

**Насиба АТАБАЕВА,
ЎзҲИА магистранти**

¹ Шайх Муҳаммад Аввома. Ҳадиси шарифнинг ўрни. 23-бет.

² Ўша асар, 31-бет.

³ Ўша асар, 40-бет

⁴ Ўша асар, 161-бет.

⁵ И моми Аъзам. Фоя муаллифи: Шайх Муҳаммад Содик Муҳаммад Юсуф. 153–155-бетлар.

⁶ Ўша асар, 172-бет.

Ким чиройлироқ бўлган?

Юсуф алайҳиссаломнинг жуда чиройли инсон бўлганлари тарихдан маълум. Айрим сийрат олимлари Юсуф алайҳиссаломдан кўра Муҳаммад соллаллоҳу алайҳи ва саллам гўзал бўлганлар, дейишади.



Пайғамбаримиз Муҳаммад соллаллоҳу алайҳи ва саллам Меъроҷ кечаси учинчи осмонга чиққанларида, Юсуф алайҳиссаломни кўриб, у зотни бундай сифатлаганлар: “**Унга чиройнинг ярми берилган экан**” (*Имом Муслим ривояти*). Бъязи олимлар мана шу ҳадиснинг зоҳирига асосланиб: “Юсуф алайҳиссалом ҳаммадан чиройли бўлган”, дейишади. Лекин бошқа муҳаққиқлар: “Пайғамбаримиз соллаллоҳу алайҳи ва саллам бутун инсониятнинг мутлақ энг чиройлиси бўлганлар”, дейишади.

Далиллари қуидагича.

Абу Ҳурайра, Анас ибн Молик, Баро ибн Озиб, Ойша розийаллоҳу анхум каби саҳобалар Расули акрам алайҳиссаломни сифатлаб, бундай дейишган:

“Пайғамбаримиз соллаллоҳу алайҳи ва саллам инсонларнинг энг гўзали, энг олийжаноби ва энг шижоатлиси бўлганлар” (*Имом Бухорий, Имом Муслим, Ибн Можа, Байҳақий ва Абу Нуайм Асбаҳоний ривояти*).

Анас ибн Молик розийаллоҳу анху айтади: “Аллоҳ таоло ҳар бир пайғамбарни гўзал юзли, овозини ёқимли қилиб юборган. Пайғамбаримиз эса энг гўзал юзлиси ва энг хуш овозлиси бўлганлар” (*Имом Термизий, Дорақутний, Ибн Адий, Ибн Мардавайҳ, Хароитий, Абу Саид Азробий ва Абу Бакр Шоғеъий ривояти*).

Жобир ибн Самура розийаллоҳу анху айтади: “Мен Пайғамбаримиз соллаллоҳу алайҳи ва салламни ойдин кечада кўрдим. Устларида қизфиш ҳулла (усти ҳам, пасти ҳам бир хил матодан тикилган янги кийим) бор эди. Сўнг (Пайғамбаримиз чиройлироқми ёки ойми, деб) бир у зотга, бир ойга қарай бошладим. Шунда у зот кўзларимга ойдан ҳам чиройлироқ кўриндилар” (*Имом Термизий ва Имом Байҳақий ривояти*).

Ризвон байъати ва кўп ғазотларда иштирок этган Рубайийъ бинти Муаввиз Ансория розийаллоҳу анходан: “Бизга Пайғамбаримизни сифатлаб беринг”, деб сўрашди.

У: «Агар сиз Расулуллоҳ соллаллоҳу алайҳи ва салламни кўрганингизда, “Порлоқ қуёшни кўрдим”, дер эдингиз», деб жавоб берди (*Имом Доримий, Табароний, Байҳақий ва Абу Нуайм Асбаҳоний ривояти*).

Бу муҳаққиқ уламолар Юсуф алайҳиссалом ҳақидаги ҳадис билан Пайғамбаримиз соллаллоҳу алайҳи ва саллам ҳақларидаги мазкур асарларни жамлаб, керакли хулоса қилишган. Масалан, Ибн Ҳажар Асқалоний “Саҳиҳи Бухорий”га ёзган машҳур шарҳи “Фатҳул Борий”да (7/210) бундай дейди:

«**Юсуф алайҳиссаломга чиройнинг ярми берилган**», деган ҳадиснинг зоҳиридан “Юсуф алайҳиссалом барча инсонлардан чиройлироқ экан”, деган маъно чиқади. Лекин Имом Термизий ривоят қилган Анас розийаллоҳу анхунинг: “Аллоҳ таоло ҳар бир пайғамбарни гўзал юзли, гўзал овозли қилиб юборган. Пайғамбарингиз эса энг гўзал юзлиси ва энг хуш овозлиси бўлганлар”, деган гапига кўра, Юсуф алайҳиссалом чиройи ҳақидаги ҳадисда келган сўз Набий алайҳиссаломга тегишли эмас. Қолаверса, бу фикрни олимларнинг: “Гапираётган киши ўз хитобининг доирасига кирмайди”, деган қоидаси ҳам қўллаб-қувватлайди.

Энди, мазкур бобдаги ҳадисга келсак, Аллома Ибн Мунаййир Сакандарий уни қуидагича тушунтирган: “Бу ҳадисдан мурод Юсуф алайҳиссаломга

Коинот чексизми?

Пайғамбаримиз соллаллоҳу алайҳи ва салламга берилган ҳусннинг ярми ато этилгани ирова қилинган”.

Ибн Қаййим ал-Жавзия “Бадоиъул фавоид” китобида (3/206) келтиради: “Пайғамбаримиз соллаллоҳу алайҳи ва салламнинг: **“Юсуф алайҳиссаломга чиройнинг ярми берилган”**”, деган ҳадислари ҳақида бир гуруҳ олимлар айтишади: “Бундан мурод Юсуф алайҳиссаломга Мұхаммад соллаллоҳу алайҳи ва салламга берилган ҳусннинг ярми берилган. Демак, Пайғамбаримиз соллаллоҳу алайҳи ва саллам ҳусннинг охирги даражасига етганлар, Юсуф алайҳиссалом эса ўша марранинг ярмига етган, холос».

Шу ўринда савол туғилади. Юсуф алайҳиссаломни кўрган бир гуруҳ аёллар маҳлиё бўлганларидан ўз қўлларини кесиб қўйишганини билмай қолишгани маълум ва машҳур. Пайғамбаримиз соллаллоҳу алайҳи ва саллам Юсуф алайҳиссаломдан икки ҳисса чиройли бўлсалар, нима учун у зот билан шунга ўхшаш ҳолат содир бўлмаган?

Мулла Али Қори “Мирқотул мағотиҳ”да (17/94) бундай дейди: «Баъзи мутааххир ҳофиз уламолар: “Аслида, Пайғамбаримиз соллаллоҳу алайҳи ва саллам Юсуф алайҳиссаломдан ҳам чиройлироқ бўлганлар. Лекин Аллоҳ таоло Пайғамбаримиздаги порлок ҳусннинг кўп қисмини яширган. Борди-ю, ўша асл ҳусн борича саҳобаларга намоён бўлганида, улар у зотга қарай олишмас эди. Баъзи муҳаққиқ уламолар шундай дейишган. Юсуф алайҳиссаломнинг чиройи эса тўсилмаган эди”.

Хуллас, уламоларнинг таҳқиқларига кўра, Пайғамбаримиз соллаллоҳу алайҳи ва саллам инсонларнинг энг чиройлиси бўлганлар.

Абдулазим ЗИЁВУДДИН,
Имом Бухорий номидаги Тошкент
ислом институти катта
ўқитувчиси

Коинотнинг чексиз экани ҳақида Зориёт сурасининг 47-оятида марҳамат қилинади:

وَالسَّمَاءَ بَيْنَهَا بِأَيْدٍ وَإِنَّا لَمُوسِعُونَ

“Осмонни йўз қудратимиз или барпо этдик. Албатта, Биз кенг қилувчимиз”.

Араб тили қоидасига кўра, феълий жумлалар ўзгарувчан, исм жумлалари эса турғунлик ва мунтазамликни ифода этади. Оятдаги «**إِنَّا لَمُوسِعُونَ**» исм жумласидир. Яъни “олдин кенгайтиридик”, “ҳозир кенгайтияпмиз”, “ке僚акда яна кенгайтирамиз” каби феълий жумлалар эмас, балки “давомли ва тўхтовсиз кенгайтирамиз”, деганидир.

Коинотнинг ҳақиқий ўлчамини тасаввуризмага ҳам сифдира олмаймиз. Агар биз Ердан самолёт ёки ракетада узоқлаша бошласақ, коинотнинг накадар бепоён эканини кўришимиз мумкин.

Биз Сомон йўли деб атайдиган ва кечалари кузатадиган галактикадаги юлдузларнинг барчasi “қуёшлар”дир. Уларнинг орасидаги масофа километрлар билан эмас, балки ёруғлик йиллари билан ўлчанади. Ёруғлик бир йил давомида 9.500.000.000.000 (9,5 триллион) км масофани босиб ўтади.

Ерга энг яқин юлдуз билан сайёрамиз ўртасидаги масофа 2 миллион, узоқлари эса триллионлаб ёруғлик йилига teng.

Ер юзига энг яқин масофада жойлашган бир нечта галактикадан ташқари, барча галактикалар ўзига хос тезлик билан бир-бирларидан узоқлашаётганини 1922 йилда, яъни бир аср олдин астрономия олими Ҳабль аниқлаган эди. Бундан маълум бўладики, коинот мунтазам равища кенгаймоқда. Белгиялик математик олим Лемейтр ҳам коинотнинг “expansion”, яъни мунтазам кенгаяётганини маълум қилган.

Биз XX асрда билган “Макон кенгайиши” қонуни бундан 14 аср олдинроқ туширилган Қуръони каримда зикр қилинган эди.

НУРМУҲАММАД тайёрлади.

Ризқнинг сабабларидан бири

بِسْمِ اللَّهِ الرَّحْمَنِ الرَّحِيمِ

قَالَ رَسُولُ اللَّهِ صَلَّى اللَّهُ عَلَيْهِ وَسَلَّمَ : سَافِرُوا ، تَصْحُّوا

Ибн Аббос розийаллоху анҳумодан ривоят қилинади: «Расулуллоҳ соллаллоҳу алайҳи ва саллам: “Сафар қилинглар – саломат бўла-сизлар ва ризқланасизлар”, дедилар» (Имом Аҳмад ва Имом Табароний ривояти).

“Сафар” сўзининг луғавий маъноси, маълум бир масофани босиб ўтиш, демак. Шариат истилоҳида эса белгиланган масофани босиб ўтиш сабабидан шаръий хукмларнинг ўзгариши. Масалан, муқимликда тўрт ракат фарз бўлган намозларни сафарда икки ракат ўкиш, Рамазон ойи рўзасини тутмасликка рухсат, маҳсига тортиладиган масҳ муддатининг узайиши, жума, икки ҳайит намозлари ва қурбонлик қилишнинг мусофири зиммасидан соқит бўлиши каби хукмлардир.

Халқимизда бундай нақл бор: “Мусофири бўлмагунча, мусулмон бўлмайсан”. Киши сафар мashaққатини бошидан ўтказганида, ёрдам ва мурувватга қанчалик мухтоҷ эканини англаб етади. Шундагина инсоннинг қадр-қиммати баландлигини, имкон қадар мухтоҷларга ёрдам кўрсатиш зарурлигини калбан ҳис қиласи.

Бундан ташқари, киши қачон ўз юритидан узоқлашса, ўз Ватанининг қадрини билади. Оиласи, бола-чақасининг ёнида бўлиш қанчалик бахту саодат эканини англайди. Ўзга диёрда юрганида ўз юритидаги каби ҳуқуқлари тўла намоён бўлмагач, Ватанидаги мавжуд эркинликни ҳис қила олмагач, она юртини ва қадрдонларини ўртаниб соғинади.

Манбаларда келтирилишича, сафар қилишда соғлиқ учун кўп манфаатлар бор. Чунки сафар табиатан ҳаракатга боғлиқ



бўлади. Жисмоний ҳаракатнинг ўзи инсоннинг соғлиғи учун нақадар фойдали эканлиги барчага маълум. Доимий ҳаракатланувчи тананинг барча аъзолари мудом тетик бўлади ва ҳаётнинг барча жабҳаларида соҳибининг ижобий ҳолатига сабаб бўлади. Аммо ҳаракатсизлик бир қанча касалликларни келтириб чиқариб, дангасалик ва уйқуга мойилликка мубтало қиласи. Зоро, дунё ҳаётининг ҳар жабҳасида пешқадам бўлиш бу дунё ва охират саодатига мушарраф қилувчи нурли йўлдир. Агар инсон ҳаётидаги ҳар он, ҳар лаҳзани ғанимат билса, албатта, бу охиратига ҳам жуда катта фойда беради.

Кишининг ҳар бир ҳолатда қолоқ бўлишига энг биринчи сабаб унинг дангасалигидир. Таnbаллик дея аталмиш хавфли касалликнинг келиб чиқиши эса аксарият ҳолларда меъёридан ортиқ таомланишдандир. Бу эса кўпгина касалликларнинг асоси ва негизи ҳисобланади.

Шундай экан, сафар қилайлик, соғлом бўламиз ва ризқимиз кўпаяди.

Миродил МИРЖАЛИЛОВ,
Қиброй тумани бош имом-хатиби

Халқимиз орасидан етишиб чиққан буюк уламолар қадимдан илму маърифат чироғини баланд кўтариб, диний ва дунёвий равнақ учун катта хизмат қилишган.

Шундай шахслардан бири Саид Ҳошимхон ибн Саид Ғозихон тўрадир. Бу зот 1912 йили Бухоро амирлиги Самарқанд беклиги Чўянтепа қишлоғида зиёли оилада тавалтуд топган. Отаси Ғозихон тўра Қуръон илми билимдони, фиқҳ ва тасаввуф илмида ўз даврининг пешқадамларидан бўлган.

Саид Ҳошимхон ибн Саид Ғозихон

Саид Ҳошимхоннинг болалик йиллари алғов-далғов даврларга тўғри келди. Чор ҳукумати халқни маърифатдан маҳрум қилишдек қабиҳ ишларга кўл урган, разил режа асосида халқ орасидаги зиёлиларни қатағон қилишни бошлаган эди. Олиму уламоларни халқ душмани сифатида айблаб, Сибирга сургун қилас, асоссиз қатл этар ва оила аъзоларини “халқ душмани”нинг яқинлари сифатида оммадан ажратиб қўярди.

Бундай қисмат Ғозихон тўранинг ҳам бошига тушди. У ҳукуматга қарши чиқиша айбланиб, ҳибсга олинди. Одамлар ўз пешвосини ҳимоя қилиб қўзғалишидан хавфсираган “қизиллар” Булунғур шаҳри яқинидаги “штаб”да Ғозихон тўрани яширинча қатл этишди. Унинг фарзандларини Фарғонадаги шогирдлари олиб кетди. Шутариқа отасининг фожиали вафотидан кейин Саид Ҳошимхоннинг ёшлиқ йиллари водийда ўтди. Бу ерда отасининг шогирдлари қўлида таълим олиб, Қуръони карими тўлиқ ёдлади. Билим олиш билан бирга, моҳир усталардан темирчилик ва чилангарлик сирларини пухта ўрганиб, моҳир темирчи бўлиб этишди.

Саид Ҳошимхон 1939-40 йилларда ота юрти Самарқандга қайтиб келди. Ўша кезлар моҳир усталарга талаб ниҳоятда катта эди. Шунинг учун ҳатто уруш йилларида ҳам колхозларга усталар жуда керак бўлганидан уни ҳарбий хизматга чақиришмади. Саид Ҳошимхон қишлоқма-қишлоқ кезар, аравами, омочми, бошқа буюмми, борини созлаб, хуфя равишда одамлар орасида илм тарқатарди.

Олим араб ва форс тилларини мукаммал билган. Форсчадан “Солатул Масъудий”, арабчадан “Тафсири Нўймон” асарларини таржима қилган. Саид Ҳошимхон тасаввуфда Хожа Аҳмад Яссавийга издош



эди. “Авродул фатҳия”, “Дуррул воизин”, “Солатул Масъудий”, “Маслакул муттақийн” каби асарларни ёдан билган, халқ орасида шаръий масалаларни ечиши билан шуҳрат қозонган.

Аллоҳ таоло Саид Ҳошимхон ибн Саид Ғозихоннинг оиласига баракот ёғдирган. Унинг 13 ўғил ва 4 қизи бўлган. Барчасини илм-маърифатли қилиб тарбиялаб вояга етказган. Фарзандлари турли соҳаларда ўз касбининг усталари бўлиб, халқимизга холис хизмат қилишган. Диний-маърифий соҳада фаолият юритганлардан бири Зайнуллохон Ғозиев (Зайнуллохон Ҳошимхон ўғли, 1958–2022) Жиззах вилояти Бахмал тумани “Саид Ҳошимхон” жомеъ масжиди имом-хатиби, яна бири Муҳаммадхон Ғозиев (1963–2018) моҳир хаттот, тасаввуф илми билимдони, шоир, “Асл Ёрга ошиқман”, “Қадр кечасини соғиниб...”, “Киприк куйдирган шабнам” каби шеърий тўпламлар, қатор қасидалар муаллифи. Кейинги фарзанди Довархон Ғозиев (1965 йилда туғилган) ҳам кўп йиллар Самарқанд вилояти “Чўянтепа” масжиди имом-хатиби бўлиб ишлаган. Диний-маърифий соҳа билимдони, моҳир хаттот.

Саид Ҳошимхон ибн Саид Ғозихон 1993 йил 9 май куни фарзанду набиралар ва кўплаб шогирдлари қуршовида 81 ёшида дорул бақоға риҳлат қилган.

Баёзхон МАҲМУДОВ,
Имом Бухорий халқаро илмий-тадқиқот
маркази илмий ходими

Мусҳафни жамлаган зотлардан бири

Маъриб тўғони бузилгач, Лахм Қаҳтоний қабиласи Яманнинг обод шаҳарларидан Шомга кўчиб ўтди. Қабиланинг бир жамоаси Рамлага ва Жавлон тепалигига, бошқа бири эса Қуддусга ўрнашди. Бир муддат уни “Лахм уйи” деб номлаб юришди. Сўнгра одамлар уни ўзгартириб “Байтул Лахм” дейдиган бўлишди. Лахмликлар ўзларининг қўшилари румликлар билан муносабат ўрнатиб, баъзилари масиҳий динини қабул қилишди. Айримлари “Муштарий” (Күёш туркумидаги юлдузлардан бири)га сифинишар ва Шом тепаликларига бино қилинган “Қайсар” ибодатхонасини зиёрат қилишарди.

Тамим ибн Хорижа Дорий Лахмий эса масихийликни қабул қилган жамоага мансуб кишилардан эди. У ҳатто “Байтул Лахм”нинг роҳибига айланган эди.

* * *

Кунларнинг бирида Тамим Дорийнинг қўшни қишлоққа иши тушди. У жундан тўқилган чакмонини кийиб, белига зуннор боғлади, кумуш хочи осилиб турадиган тақинчоғини бўйнига илиб, қалпоғини бошига қўндириб, ўша қишлоқ сари йўлга чиқди. Йўлда бир умр ёдда қоладиган воқеага дуч келди.

* * *

Тамим Дорий айтади: «Расууллоҳ пайғамбар қилиб юборилган кезлар эди. Қўшни қишлоққа бораётганимда қоронғи тушиб қолди. Юрагимга ваҳима оралади. Араблар жинлардан паноҳланиш учун айтадиган “калималар”дан бири: “Мен



бу кеча шу водийнинг улуғ ҳимоячиси паноҳидаман”ни баланд овозда айтиб боравердим. Бир жойда тўхтаб ётиб ухламоқчи бўлганимда, бирданига бир киши (мен уни кўрмадим) бундай деди: “Эй одам, сен Аллоҳга юкин ва ундан паноҳ сўра. Чунки жин ҳеч кимга паноҳ беролмайди”. Мен: “Айтганларинг ростми?” дедим. У: “Уммийлар пайғамбари чиқди, бизлар унга эргашдик. Жинларнинг ҳийласи тугади. Уларга шуҳуб – учар юлдузлар отилди. Энди сен ҳам бутун оламлар Раббиси юборган пайғамбарга эргаш”, деди.

Тамим айтади: «Тонг отгач, “Айюб” номли насоролар ибодатхонасига бордим. У ерда жуда кексайиб қолган бир роҳиб яшарди. Нима бўлганини унга айтиб бердим. У гапларимни эшитиб: “Сенга

тойибдан келган овоз рост айтиби”, деди. “Ўша пайғамбар Макка диёридан чиқади ва у набийларнинг энг яххисидир. Дарҳол ўша ёқса отлан...” деди».

* * *

Тамим Дорий роҳиблик жуббасини ечиб, Ҳинд исмли оғаси билан Мадина са-ри йўлга тушди. Ака-ука Мадинага етиб боргач, уловларини масжидга яқин жойга чўқтиридилар ва Расулуллоҳни излашга тушдилар. Ака-ука у зотнинг хузурларида тавҳид калимасини айтиб, иймон неъмати билан шарафланди.

Ўша ерда Тамим Набий алайхиссаломга: “Эй Аллоҳнинг Расули, Аллоҳ сизнинг динингизни голиб қиласди ва байроғингизни ҳамма жойда ҳилпиратади. Мен ортимда оиласи ва бошпанимни қолдириб, бу ёқса ўзимни Аллоҳ ва Расулига бағишлиш учун келдим. Эй Аллоҳнинг Расули, агар мусулмонлар Аллоҳнинг нусрати ила Байтул Мақдисни ишғол этсалар, менга қишлоғим Жибрийни ҳадя этинг”, дедим. У зот гапимни эшитиб, қишлоқни ҳадя этдилар. Тамим бунинг учун менга бир хат битиб беринг, деб сўради. Расулуллоҳ алайхиссалом Тамимга бир мактуб битиб бердилар.

* * *

Ҳижратнинг ўн бешинчи йили мўминлар амири Умар ибн Хаттобга қўмондон Амр ибн Оснинг Байтул Мақдисни фатҳ этгани ҳақидаги хушхабар етиб келди. Байтул Мақдис аҳолиси мусулмонлар амири Умар ибн Хаттобнинг ўзи келиб биз билан сулҳ тузсин, деб туриб олганини ҳам етказиши. Умар Форуқ озод этилган Фаластин заминига бориб, ўз қўллари билан Фаластин аҳолиси учун сулҳни имзолади. Лахм яшайдиган Жулон тепаликларида ҳам аzon овозлари янграй бошлади.

Лахм ўғлони Тамим Дорий ўрнидан туриб:

– Эй мўминлар амири, Байтул Мақдисни мусулмонлар фатҳ этди, яъни Аллоҳ уларга нусрат берди, Расулуллоҳ менга қишлоғим Жибрийнни ҳадя этган эдилар. У зот ҳадя этган қишлоқни менга беринг, – деди.

– Бунга ким гувоҳлик беради? – деб сўради Умар Форуқ.

Шунда саҳобалардан бири туриб:

– Мен гувоҳлик бераман, – деди.

Умар ибн Хаттоб Расулуллоҳ алайхиссаломнинг Тамим Дорийга ҳадясини тасдиқлаб берди.

* * *

Тамим Дорий Исломга киргандан бошлаб Масжиди Набавийни камдан-кам ҳолатда тарқ этар, Аллоҳнинг каломи – Қуръонни кечаю кундуз тиловат қилар, ҳатто ҳафтасига бир марта ҳатм қилишни ўзига одат қилганди. У Расулуллоҳ соллаллоҳу алайҳи ва саллам замонларида Мусҳафни жамлаган саноқли кишилардан бири эди.

Тун пайти у Оламлар Рабби хузурида туриш учун тўлиқ зийнатланиб, таҳажҷудни адо этишга киришар эди. Бир кеча уйқуси зўрлик қилиб, таҳажҷуд намозига тура олмади. Шундан кейин у ўз нафсини жазолаш учун бир йил тўлиқ кечалари ухламасдан ибодат қилиб чиқди.

Тамим Дорий икки нур соҳиби – Усмон ибн Аффон шаҳид этилгунга қадар Расулуллоҳ соллаллоҳу алайҳи ва саллам шахрининг қўноғи бўлди. Сўнгра Шом диёри яқинидаги қишлоғида омонатини топширди. У “Жавлон” қабристонига дафн этилди.

* * *

Кўп ибодат ва кўп сажда қилувчи Тамим Дорийдан Аллоҳ рози бўлсин, қабрини мунаввар айлаб, унга жаннатнинг олий боғларидан маскан берсин.

*Манбалар асосида
Мурод МЎМИН тайёрлади.*

*Ассалому алайкум ва
раҳматуллоҳи ва
баракотуҳ.*

СҮРАГАН

ЭДИНГИЗ...



САВОЛ: Жаноза намозига кечикиб келдим, биринчи тақбирга улгурмадим. Имом билан қўшилиб, иккинчи, учинчи ва тўртинчи тақбирларни айтдим. Биринчи тақбирим нима бўлади?

ЖАВОБ: «Киши жаноза намозига келганида имом биринчи тақбирни айтиб бўлган бўлса, жаноза намози ниятини қилиб имом иккинчи тақбирни айтишини кутиб туради ва (имом иккинчи тақбирни айтганда) имом билан бирга тақбир айтади. Қачон имом жаноза намозини тутгатса, (муқтадий салом бермайди) тобут кўтарилишидан аввал қолиб кетган тақбирни айтиб қўяди» (“Фатавои ҳиндия”).

САВОЛ: Айрим жойлардаги баъзи масжидларда жума куни жума намозининг фарзида одамлар имомга қўшилиб, жўр бўлиб салом бериш одати бор. Шундай қилиш жоизми?

ЖАВОБ: Йўқ, жоиз эмас. Жамоат намозларида фақат имом овоз чиқариб, жаҳрий салом беради. Имомга эргашганлар маҳфий тарзда салом берадилар. Имомга қўшилиб, овоз чиқарган ҳолда жўр бўлиб салом бериш суннатга хилофдир.

САВОЛ: Совуқ кунларда ҳајж ёки умра қилиши асносида иккى қаватли эҳром ўраса бўладими?

ЖАВОБ: Ҳавонинг совуқлиги боис икки қават эҳром ўрашнинг ҳеч қандай зарари йўқ, Энг асосийси, эркак киши эҳромда тикилган кийим киймаслиги шарт.

“Эҳромдаги эркак киши учун кийими ни одатда кийиладиган тарзда кийиш тақиқланади. Агар шимини изор каби боғлаб олса ёки одатий кийимининг енгини киймасдан устига ташлаб олса, зарари йўқ” (“Захираи Бурҳоний”).

САВОЛ: Ислами қай тартибда ўзгартиши мумкин?

ЖАВОБ: Шариатда исм ўзгартириш учун алоҳида маросим ёки қоида йўқ. Ислами ўзгартирган киши бу ҳақда ўзига яқин инсонларга эълон қилиб қўйса, кифоя.

САВОЛ: Аёлим билан 8 ой бирга яшамадик. Энди никоҳ ўқитишимиз керакми?

ЖАВОБ: Агар талоққа, ажрашишга оид бирор сўз айтмаган бўлсангиз, бирга яшамасликнинг ўзи билан ўртага талоқ тушиб қолмайди. Никоҳ ўқитиш лозим эмас.

САВОЛ: Яқин кунларда набирали бўламиз. Яқинларим чучвара пишириб, момоларга бергин, тугунлари осон ечилади, дейишияпти. Аввало, Аллоҳ таоло ҳар қандай тугунни Ўзи ечади-ку. Яқинларимнинг гапи тўғрими? Менга маслаҳат беринг.

ЖАВОБ: Аллоҳ таоло набирангизни эсон-омон ёруғ дунёга келишини насиб этсин.

Яқинларингиз айтаётган нарсалар нотўғри, бидъат-хурофотдан бошқа нарса

эмас. Уларга қулоқ солманг. Ҳар қандай муаммони ечадиган Зот – Аллоҳ таолонинг Ўзидир. Ихлос билан кўпроқ ибодат қилиб, дуода У Зотдан мадад сўранг. Келинингиз ҳам Оятул курсийни кўп-кўп ўқисин.

САВОЛ: *Эҳромдаги эркак кишининг оёқ кийими қандай бўлиши керак?*

ЖАВОБ: Эркак киши эҳром вақтида икки оёғига оёқ устидаги бўртган қисмини ёпмайдиган оёқ кийимни кияди. Бу ўринда “тўпиқ” деганда, оёқнинг икки ёнидан бўртиб чиққан суюк тушунилмайди.

Бу борада “Фатавои ҳиндия” китобида бундай дейилган: «Эҳромдаги эркак киши кўйлак, чакмон, шим, салла, дўппи, маҳсига ўхшаш тикилган кийимлар киймайди. Аммо маҳси тўпиқнинг пастидан кесилган бўлса, уни кийиш жоиз. “Тўпиқ” деб бу ўринда (яъни эҳром масаласида) оёқнинг устки қисмидаги бўртган, пойафзал или боғланадиган жойи назарда тутилади. “Табийин” китобида шундай дейилган».

Агар эҳромдаги киши тикилган кийим ёки оёқ устидаги бўртган қисмини ёпувчи оёқ кийимни камида бир кундуз ёки бир кечадан (яъни 12 соат) тўлиқ кийиб юрса, Ҳарам чегарасида битта кўй сўйиши вожиб бўлади. У ерда маблағи бўлмаган киши уйига келганидан кейин бўлсада, бир қўйнинг қийматини Ҳарамга жонлиқ сўйиш учун жўнатади. Агар бир кундуз ёки бир кечадан кам муддат тикилган кийим ёки оёқ устидаги бўртган қисмини ёпувчи оёқ кийимини кийса, икки кило буғдой қийматича пул садақа қилиши вожиб бўлади.

Ўзбекистон мусулмонлари идораси Фатво маркази
(78) 150-33-44

Жин ва шайтонлар кўринадими?

Жин ва шайтон борлигига ишонамиз. Уларни биз инсонлар кўролмаймиз.

Жинлар Аллоҳ таолонинг иродаси или одамларнинг кўзидан яширинган. Аллоҳ таоло ҳайвонларга уларни кўриш қобилиятини берган. Ҳайвонлар одамлар кўрмайдиган нарсаларни кўришлари ва ҳис қилишлари мумкин.

Одамлар ультрабинафша нурларни кўрмайдилар, асалари эса булутли ҳавода ҳам қуёшни кўради. Инсонлар дельфинлар, кўршапалаклар ва бошқа шу каби жонзотлар томонидан коинотга йўналтирилган ультратовуш диапазонини эшитмайди. Ҳайвонлар эса зилзила, тўфон ва шу каби табиий оғатлар яқинлашиб келаётган ҳавфни олдиндан сезадилар. Инсоният эса аксар ҳолларда тахмин қиласи, холос.

Жинлар биз учун кўринмас мавжудотлардир. Бироқ уларнинг яшаш жойи Ер юзидир. Биз уларни кўрмаслигимиздан жинлар мавжуд эмас деган хулоса келиб чиқмайди. Бу бизнинг ҳисларимиз чекланганини англатади. Аммо бошқа мавжудотлар жинлар ва шайтонларни кўришга қодир.

Расулуллоҳ соллаллоҳу алайҳи ва саллам бундай деганлар: *“Агар хўроznинг қичқириғини эшитсангиз, Аллоҳ таолодан фазли ва марҳаматини сўранг. Чунки у (хўроz) фариштани кўрган. Агар эшакнинг ҳанграшини эшитсангиз, Аллоҳ таолодан шайтондан асрашини сўранг. Чунки у (эшак) шайтонни кўргандир”* (И мом Бухорий ва И мом Муслим ривояти).

“Кечаси итларнинг ҳуришини ва эшакларнинг ҳанграшини эшитсангиз, Аллоҳ таолодан шайтондан асрашини сўранг. Чунки улар сиз кўрмаган нарсани кўради. Кечаси ҳамма ухлаб ётганда камроқ кўчага чиқинглар. Аллоҳ таоло тунда маҳлуқотларидан хоҳлаганича юборади”, деганлар (И мом Бухорий ривояти).

Кечаси итнинг ҳураётганини ёки эшакнинг ҳанграшини эшитгач, ушбу дуони ўқиймиз: “Аъу’зу биллаҳи минаш шайтонир рожийм”, яъни Аллоҳ номи билан лаънатланган шайтондан паноҳ тилайман.

Раббимиз ёмонликлардан асрасин!

Митти чивин билан халок қилинди

بِسْمِ اللَّهِ الرَّحْمَنِ الرَّحِيمِ

أَلَمْ تَرِ إِلَى الَّذِي حَاجَ إِبْرَاهِيمَ فِي رَبِّهِ أَنْ آتَاهُ اللَّهُ الْمُلْكَ إِذْ
قَالَ إِبْرَاهِيمُ رَبِّي الَّذِي يُحِبُّ وَيُعِيشُ قَالَ أَنَا أُحِبُّ وَأُمِيتُ قَالَ
إِبْرَاهِيمُ فَإِنَّ اللَّهَ يَأْتِي بِالشَّمْسِ مِنَ الْمَشْرِقِ فَأَتَ بِكَمَا مِنَ الْمَغْرِبِ
فَبِهِمَّةِ الَّذِي كَفَرَ وَاللَّهُ لَا يَهْدِي الْقَوْمَ الظَّالِمِينَ ﴿٢٥٨﴾



«Аллоҳ салтанат берганидан (ғуурланиб), Иброҳим билан унинг Рабби хусусида баҳлашган кимсани (Намрудни) кўрмайсизми?! Қайсики, Иброҳим: “Менинг Рabbим тирилтиради ҳам, ўлдиради ҳам”, деганида, у: “Мен (ҳам) тирилтираман ва ўлдираман”, деди. Иброҳим айтди: “Аллоҳ Қуёшни Машриқдан чиқаради, сен уни Мағрибдан чиқаргин-чи?” Бас, (ўша) кофир (гап тополмай) лол бўлиб қолди. Аллоҳ золим кишиларни ҳидоят сари йўлламагай» (Бақара сураси, 258-оят).

Иброҳим алайҳиссалом билан баҳлашган, худолик даъвосини қилган шоҳнинг исми Намруд ибн Канъон бўлиб, у энг ғаддор ва шафқатсиз ҳукмдор эди. Худо берган давлатига маст бўлиб, мағрурланди. Қурғоқчилик пайти ундан ёрдам сўраб келганларга “Раббиниз ким?” дер, “Сенсан” демаганларга ҳеч нарса бермас, шу зайл ҳаммани ўз таъсири остига олган эди.

Ҳазрат Иброҳим алайҳиссалом одамларни ўzlари ясаган бутлар-

га топинишдан қайтариб, ягона Аллоҳга ибодат қилишга чорлаганида, у жуда ғазабланди. Иброҳим алайҳиссаломни хузурига чақиртириб:

– Раббинг ким? Кимга итоат қиласан? – деди.

Ҳазрат Иброҳим алайҳиссалом:

– Менинг Рabbим шундай Зотки, ҳам ҳаёт беради, ҳам ўлдиради. Ҳаёт ато қилиш ва уни қайтариб олиш фақат Унинг қудратига хосдир, – деб жавоб берди.

Намруд қаҳқаҳа отиб кулди ва бундай деди:

– Шу ҳам иш бўлибдими? Мен ҳам истаганимга ҳаёт бериб, истаганимни ўлдира оламан. Модомики, бу ишни қила олган илоҳ бўла олар экан, мен худоман.

У шундай дегач, зиндандан тўрт одамни олиб келишни буюрди. Иккисини ўлдириб, қолган иккисини кўйиб юборди. Сўнг кибрланган ҳолда:

– Мана, истаганимни ўлдиридим, истаганимга ҳаёт бердим, – деди.

Шунда Иброҳим алайҳиссалом:

– Менинг Рabbим бўлган Аллоҳ қуёшни шарқдан чиқарип, ғарбга боттиради. Агар сен илоҳ бўлсанг, уни ғарбдан чиқарип, шарққа боттир-чи? – деди.

Бу далил олдида Намруд ҳеч нарса дея олмай қолди. Ҳазрат Иброҳимни сўз ва мантиқ ила енга олмаслигини билгач, жуда катта олов ёқтириди ва уни оловга ташлади. Аллоҳнинг изни илиа олов Иброҳим алайҳиссаломни куйдирмади...

Ана шундай улуғлик даъво қилиб, Аллоҳ таолонинг Пайғамбарини оловга отишдек тубан ишларга журъат қилган Намруд кун келиб, бир чивин олдида ожиз бўлиб, нима қилишини билмай қолди. Ўзини шундай қудратли санаган шоҳнинг бир кичик чивин

боис ороми йўқолган эди. Қаерга бормасин, чивин унинг ортидан қолмас, гоҳ бурнига, гоҳ юзига қўнар, чақиб қочарди. Уни тутишга, ўлдиришга ҳарчанд уринмасин, удалай олмади. Бу ишга бутун сарой аҳли сафарбар қилинди. Ҳамма чивиннинг ортидан тушар, аммо ҳеч ким уни тута олмас эди. Эшиклар, дeraзалар беркитилиб, тамбаланса ҳам, чивин ичкарида пайдо бўлиб қолаверарди.

Аллоҳнинг ҳикматини қарангки, илоҳликни даъво қилган Намруд бир чивин олдида ожиз қолдирилган эди. Энди у саройда у хонадан бу хонага қочар, чивиндан қутулиш учун нима бўлса, қилиб кўрар, аммо чивин уни таъқиб қилишдан тўхтамасди. Унинг атрофида ҳамма хизматкорлари парвона бўлар, қўлларидан келган чора-тадбирларни кўрарди.

Кутилмаганда чивин Аллоҳнинг амри билан Намруднинг бурнига кириб кетди. Ўша кундан бошлаб унда чидаб бўлмас бош оғриги бошланди. Миясига қадар етган чивин уни мислсиз бир азобга гирифтор қиласди. Намруд чора тополмай бошига тўқмоқ билан урдира бошлади. “Уринг, уринг”, дер, чивин миясига берган азоб олдида тўқмоқнинг зарбини ҳис қилмасди. “Қаттиқроқ, тезроқ уринг” деб такрорлайверарди. Бошидан қонлар оқа бошлади ҳамки, бошига урдиришда давом этди. Бунга ҳам чидамай, ўзи бошини деворларга ура кетди. Ҳеч нарса наф бермади. Намруд бошидан еган зарбалар оқибатида беҳуш бўлди. Чивин ҳамон унинг миясида эди. Золим Намруд кўп ўтмай қийналиб жон берди...

Манбалар асосида
Абдулатиф ХУДОЙБЕРДИ ўғли
тайёрлади.

Ҳақ эгасига қайтарилади

Бир куни Мусо алайҳиссалом Аллоҳ таолога муножот қилиб деди: “Эй Рabbim! Сенинг адодатингга шак йўқ. Аммо бу дунёда бир-бирига зулм қилаётганлар бор. Мазлум одам ўзига зулм қилган кишидан шу дунёning ўзида ҳақини олиши мумкинми?”

Аллоҳ таоло: “Эй Мусо! Аср вақтидан кейин фалон жойга борсанг, мазлум золимдан ўз ҳақини қандай олганини кўрасан”, деди.

Мусо алайҳиссалом айтилган вақтда айтилган жойга етиб бордилар. У ер тоғли жой бўлиб, тоғнинг тепасидан шарқираб сув оқиб тушаётган экан. Мусо алайҳиссалом бу ерда нима бўлар экан, деб бир чеккада кузатиб турдилар. Бир пайт тяуга мингандан одам келди. Уловидан тушиб сув ичмоқчи бўлди. Белбоғини ечиб бир чеккага қўйди. Сувдан қониб ичди ва тяусини ҳам суғорди. Бироз дам олгандан кейин тяусига миниб кетди. Аммо белбоғини унтутиб қолдирди. Бироздан сўнг ўша ерга эшак мингандан ёшгина йигит келди. У ҳам уловидан тушиб сувдан ичди ва эшагини ҳам суғорди. Бир пайт ерда ётган белбоққа кўзи тушди ва уни олиб қараса, ичиди анчагина тилла ва қимматбаҳо тақинчоқлар бор экан. Бола у ёқ-бу ёққа қаради-да, ҳеч ким кўринмагач, белбоғни олди-да, жўнаб қолди. Орадан кўп ўтмай, сув ичгани кекса бир чол келди. У сув ичиб турган эди, белбоғини унтутиб қолдирган тяукаш келди ва белбоғини қўйган жойидан ахтарди. Топа олмагач, чолдан белбоғини сўради. Чол эса белбоғни кўрмаганини айтди. Шунда тяукаш жаҳл билан чолни бир урган эди, у нафас ололмай ўлиб қолди.

Бу воқеани кузатиб турган Мусо алайҳиссалом Аллоҳ таолога нидо қилиб: “Эй Рabbim! Ахир, беайб бир қарияни ўлдирди-ку?!” дедилар. Шунда Аллоҳ таоло: “Эй Мусо! Бу қария кўп йиллар олдин тяукашнинг отасини ноҳақ ўлдирган ва бундан ҳеч кимнинг хабари йўқ эди. Эшак мингандан боланинг отаси эса тяукашнинг кўлида йигирма йил ишлаган, аммо тяукаш унинг ҳақини бермаган эди. Бугунга келиб бола отасининг ҳақини олди, тяукаш эса отасининг қотилини ўлдирди”, деб жавоб берди.

Ўзбекистон мусулмонлари идораси
раисининг биринчи ўринbosари
Ҳомиджон қори ИШМАТБЕКОВ
таржимаси



Дунёдаги энг сахий халқ

Буюк Британиянинг Charities Aid Foundation's ташкилоти ҳар йили дунёнинг 119 мамлакатида сўровномалар ўтказиб, хайрия ва беминнат кўмак ишларида қайси халқ вакиллари фаол эканини аниқлаб, рейтинг тузади.

Мана бешинчи йилдирки, кетма-кет индонезияликлар рейтингда биринчиликни эгаллаб, сайёрадаги энг сахий халқ деб тан олинди, дея хабар беради Coconuts Jakarta нашри.

Сўровда иштирок этган мамлакат ахолисининг 68 фоизи моддий хайр-эҳсонлар ёки кўнгилли ишлар орқали муҳтоjlарга ёрдам беришга тайёрлигини билдирган. Тадқиқотга кўра, индонезияликларнинг қарийб 80 фоизи хайрия ишларига пул ажратади ва 60 фоизга яқини ўз меҳнати ва вақтини сарфлайди.

Кўкаламзорлаштириш лойиҳаси

Саудия Арабистони расмийлари Масжидул Ҳаром ҳовлиларини ободонлаштириш ва кўкаламзорлаштириш лойиҳасини ишга туширди.

Ижтимоий тармоқларда Масжидул Ҳаромнинг яшил майдонлари акс этган видеолар тарқади, деб ёзади IslamNews.

Лойиҳа ижодкорлари ободонлаштириш ишлари зиёратчиларга халал бермаслигини таъкидлашди. Улар кўкаламзорлаштириш ишларида ҳаво алмашинувини яхшилашга хизмат қилувчи, ҳашаротларни ўзида жамламайдиган ўсимликлар танлаб олиниб, экилаётганини қайд этишди.

Футболчи мукофотни онасига топширди

Марокаш терма жамоаси ҳимоячиси Ашраф Ҳакими барчага ўrnak бўладиган ишни амалга ошириди.

У Ар-Риёдда бўлиб ўтган "Joy Awards" танловида 2022 йилнинг энг яхши араб спортчиси сифатида эътироф этилди. Анъянага кўра, бу соврин Яқин Шарқдан келган спортчиларга берилади.

Мукофотлаш маросимида Ҳакими мазкур мукофотни олиб, уни онасига топширди. Унинг бу хатти-ҳаракати дунё ижтимоий тармоғида эътироф этилди.

Марказий Осиёдаги энг йирик масжид

Тожикистон пойтахти Душанбе шаҳрида 2009 йилдан бўён қатарлик ҳомийлар кўмагида қурилаётган улкан масжид жорий йилнинг иккинчи чорагида очилади.

Бу ҳақда Тожикистон Диний кўмитаси раҳбари Сулаймон Давлатзода маълум қилди. У қайд этишича, Марказий Осиёнинг энг йирик 120 минг ўринли масжид Қатар делегацияси иштирокида очилади.

Тожикистон расмийларига кўра, мазкур масжид 2020 йилнинг август ойида очилиши керак эди, аммо Covid-19 эпидемияси туфайли қолдирилган.

Лойиҳанинг қиймати 100 миллион долларни ташкил этади.

“Келажак масжиди” лойиҳаси

Баҳрайн расмийлари Ислом меъморчилигини қайта кўриб чиқиб, янги масжид лойиҳасини маъқуллади.

Унга кўра, ушбу масжид футуристик (келажак) услубда барпо этилади.

Лойиҳа меъмори Али Каримийнинг сўзларига кўра, қурилиш қиймати тахминан 700 000 Баҳрайн динорини ташкил этади. Бу анъанавий услубдаги масжидлардан 10–20 фоизга арzon.



Сайёҳлар учун янги дастур

Саудия Арабистони Saudia Airlines авиакомпанияси йўловчиларига чипта билан бирга 96 соатлик туристик виза олиш имконини берувчи дастурни ишга туширди.



Саудия хукумати “Сизнинг чиптангиз виза” дастури доирасида 2023 йилда ҳалқаро рейсларга талаб 40 фоизга ошишини кутмоқда.

Қубо масжиди кенгайтирилмоқда

Мадина шаҳри ҳокимлиги Пайғамбаримиз Мұхаммад соллаллоҳу алайҳи ва саллам тамал тошини қўйган Қубо масжидини кенгайтиришнинг биринчи босқичи бошланганини эълон қилди.

Лойиҳага кўра, масжиднинг умумий майдони 10 баробар кенгайтирилиб, 66 000 намозхонни сиғдира олади ва Қубо масжиди учинчи йирик масжидга айланади.

Ислом тарихидан маълумки, Қубо масжиди Мадинада қурилган илк масжид бўлиб, 622 йилда бунёд этилган. У Масжидун Набавийдан 5 km узоқлиқда жойлашган.

Ҳалол маҳсулотларга талаб ортмоқда

Сўнгги йилларда ҳалол маҳсулотлар ва хизматлар бозори жадал ривожланиб бормоқда.

Бу жараёнда ўсиш суръати йилига 5 фоиздан 15 фоизгача кўтарилиб, глобал ҳалол саноатининг йиллик айланмаси 2 триллион долларни ташкил этди. 2024 йилга келиб бозор ҳажми 3,5 триллион долларга етиши кутилмоқда. Ҳалол маҳсулотларнинг асосий бозорлари Саудия Арабистони ва БАА ҳисобланиб, Саудия Арабистони йилига 1,2 миллиард долларлик гўшт импорт қилади. Гўшт маҳсулоти эса жаҳон экспортида ҳалол маҳсулотлар улушининг тахминан 35 фоизини ташкил этади.

Россиянинг Россельхознадзор ташкилоти 2022 йилда Россиядан ҳалол маҳсулотлар экспорти деярли 50 фоизга ошганини хабар қилди.

Фармацевтика соҳасида янгилик

Британия фармацевтика институти ўқитувчиси 29 ёшли Асир Авад кейинги йилларда кўплаб ютуқларга эришиди.

Ёш муслима илк тадқиқотларини тиббиётга қаратди ва ҳамкаслари билан биргаликда 3D принтерида беморлар учун энг қулай шаклда дори-дармонларни ишлаб чиқариш технологияси ва сувсиз ютиб юборадиган таблеткаларни кашф этишиди.

Асир Авад кўплаб мукофотларга сазовор бўлди. Хусусан, 2022 йилда Халқаро фармацевтика федерациясининг “порлаган юлдузи” сифатида эътироф этилди.



Интернет маълумотлари асосида тайёрланди.

Тасаввуфий қарашларнинг яхлит таълимот сифатида Ислом ўлкалариға кенг ёйилиши, ижтимоий ҳаётда муҳим воқеликка айланишида Мовароуннаҳр ва Хурсондан етишиб чиқкан олимларнинг ўзига хос ўрни бор¹. Хусусан, XIII–XIV асрларда яшаб ижод этган тасаввуфий олим Шайх Хованд Тохур ўрта асрлар ижтимоий-сиёсий ҳамда маданий ҳаётида ўзига хос ўринга эга намояндалардан саналади.



Шайх Хованд Тохур асарларида ижтимоий масалалар

Унинг асарларида зохирий (диний ва дунёвий), ботиний (сўфийлик) илмлар ўрин олган бўлиб, нафакат ўрта асрлар, балки бугунги кун ижтимоий муаммолар ечимида ҳам муҳимдир.

Шайх Хованд Тохур (Пок Шайх) машҳур тариқат вакилларидан бири Шайх Умар Боғистонийнинг фарзанди. Хованд Тохур илоҳиёт ва тариқатга доир илк сабокни отасидан олди. Фахруддин Али Сафийнинг “Рашаҳоту айнил ҳаёт”ида ёзилишича, Шайх Хованд Тохур илоҳиёт ва тасаввуф илмининг улуғларидан бири, етук мутасаввифлардан эди. У тавҳид ва тасаввуфга оид ибораларга шарҳ ёзган. Шеъриятда ҳам фасих бўлган².

Шайх Хованд Тохур бир неча асарлар муаллифи саналади. Олимнинг тарбиявий аҳамиятга эга меросини ўрганиш ёшлар маънавиятини юксалтиришда алоҳида аҳамият касб этади. Инсониятни халқпарвар ва жамиятга фойда бериш руҳида тарбиялаш Шайх Хованд Тохур асарларининг асосини ташкил этади. У кишининг мероси халқ ҳаёти, жамият манфаатига хизмат қилиши, шахс маънавиятини шакллантириши, ахлоқий билимларини бойитиши билан бугунги кунда ҳам қадрлидир.

Шайх Хованд Тохур “Рисола дар масойили шариат ва тариқат” асарида инсонни комилликка етакловчи, ўзлигини англашида, ҳақ йўлдан адашмаслигида муҳим эслатмалар беради. Масалани чуқурроқ тушунтириш мақсадида қиёс учун бундай дейди:

“Табиблар тўрт хил касалликни даволай олишмайди. Улар – истисқо (сариқ сув касаллиги), диққ (сил касаллиги), жузом (мохов касаллиги) ва девонагий (жиннилик). Агар қиёсланса, истисқо – дунё ва унинг молига ҳаддан ташқари ҳирс қўйишдир. Диққ – худбинлик иллати. Жузом – жони ва руҳида тузалмас иллат ёпишган киши бўлиб, уни бир кўрган киши қайта кўришни орзу қилмайди. Жиннилик – беҳаловатлик, васвосдир...”

Ҳазрат аслида ҳеч бир инсон ҳирс, баҳиллик, ҳасад, гина, зулм каби иллатлардан холи бўлмаслигини, бу иллатлар инсонни енгиб, хароб этмаслиги, балки улардан холос бўлиш учун Пайғамбаримиз алайҳиссалом суннатларини маҳкам тутиш зарурлигини таъкидлайди.

Аждодлар меросини ўқиб, ўрганиб, тадқиқ этиш, уларнинг фойдаларидан халқимиз, айниқса, ёшларни хабардор этиш орқали бу иллатларни бартараф этиш имконияти кенгаяди.

Хуршида УСМОНОВА,
Ўзбекистон халқаро ислом академияси
мақсадли таянч докторанти

¹ Усмонов И. Тасаввуф фанидан ўкув-услубий кўлланма. – Т.: Тошкент ислом университети нашриёт-матбаа бирлашмаси, 2012. 3-бет.

² <https://qomus.info/encyclopedia/cat-sh/shayx-xovandi-tohur-uz/>

Мўъжизалар гулдастаси

Инсон қўзи билан кўрган яхши ё ёмон нарса унинг қалбидаги аксланади, кечинмалар ҳосил қиласди. Тафаккур ва таҳассус (ҳислар) атрофга ибрат назари билан боқсанларда бўлади.

Аллоҳ таоло бандаларини оламга ибрат назари билан қарашга ундан, басират қўзи билан боқишига буюрган: “Улар туяга, булатга, ёмғирга, тоғларга, яшил ўсимликларнинг қишида қандай ўлиб, баҳорда яна қайта тирилишига, ўтган қавмлардан қолган асарларга... боқмайдиларми?”

Жуда кўп оятларда “Ақл юргизмайдиларми? Фикр қилмайдиларми? Идрок этмайдиларми?” дейа одам боласи ҳаётни, коинотни шунчаки томоша эмас, тафаккур ва идрок ила мушоҳада қилиши лозимлиги таъкидланган.

Коинот нашъалар булоғидир. Инсон ҳам илоҳий нашъанинг бир тажаллийсидир. Кўрувчи кўзлар, эшитувчи қалблар Ер юзида илоҳий нашъадан бошқа бирон нарсани кўрмайди, эшитмайди.

Инсон тонгда бошини кўтариб, чиқаётган қуёшга қараб фикр этиши, уфқдаги ранго-ранг чизиқларни кўриб, тафаккур қилиши керак. Бир рассом чизган оддий сурат олдидаги ҳайрон боқсан кўзлар Буюк Мусаввир яратган ақлларни лол қолдирувчи бетакрор мавжудотларни кўрганида қандай қилиб Унга таслим бўлмаслиги мумкин?

Лола ё бинафшага қаранг! Ажабо, улар бунча ранглар ва гўзалликни қора тупроқнинг қаеридан олишди экан? Ёки тутнинг тоти ва жилосини кўринг. Қуёш нурлари билан ўйнашган турфа ранг гулларга боқинг... Санаб адогига етиб бўлмайди бу гўзалликларни...

Бу олам мўъжизалар гулдастасидир. Бир гулнинг ишваси, ари ва капалакнинг парвози, парвонанинг куйиб-ёниши, булбулнинг сайроғи ва... ўзингизга ҳам назар солинг... Бу гўзалликлар Зул жалол вал

икром Раббимизнинг яратиқларидан бир қисмидир...

Тонг ёришаркан, илк нурлари ила дунёни ёритган қуёш бошланган янги кун саломини келтираётуб бизга гёё “Уйғон” дейа мана бундай насиҳату эслатма қиласди:

“Қара, сенга бугун ҳам ҳаёт дафтарингдан яп-янги саҳифа ҳадия қилинди. Қиёматда ўзингга бериб ўқитиладиган бу саҳифани нима билан тўлдирасан? Китобингни ўқи, бугун сендан ҳисоб сўраш учун нафсинг кифоя!” дейиладиган у даҳшатли кун учун бугун қандай ҳозирлик кўришни ўйлаяпсан?...

Кеч тушиб, осмон қизариб, сўнг тўлқин-тўлқин бўлиб қорайганида кеча ўз ҳоли тилида одамзодга:

“Мана, сенга инъом қилинган саноқли муддатдан яна бир кунинг ўтди. Ўлим сенга яна бир қадам яқинлашди. Оҳ-фион қилиш, нолиш фойдасиз. Қанчалик уринма, бу кунни энди ортга қайтара олмайсан. Бирордан сўнг сени ўлим тимсоли бўлган уйқу элитади. Хўш, бугун қандай солиҳ ишлар қилишинг керак эди? Нималар қилишга улгурдинг? Қила олган ва олмаган ишларингни бир таҳлил эт!.. Балки эртанги кунни кўрмаслигинг ҳам мумкин! Шу ҳақда ўйлаб кўр...” дейди.

Борликқа тафаккур ва ҳислар билан юзланган қалблар Аллоҳ таолони танийди. Инсоннинг бу ибрат ва ҳикматга йўғрилган юзланишида энг катта ёрдам Ҳақнинг валийси бўлган солиҳ кишилар билан дўстлашиши, яъни кўнгил яқинлиги ҳосил қилишидир. Унинг жамолига етгунча Унга яқин бўлган валий зотлар билан унсият (дўстлик) қуриш заруратидир. Чунки маънавий даража лаҳзалик бўлмай, босқичмабосқич ҳосил бўлади. Зоро, соғлом ақл бошқа бир соғлом ақлдан улги олади. Йўли ойдинлашиб, ён-атрофни, манзилни яхши кўра бошлайди...

**Абдулатиф АБДУЛЛАЕВ
тайёрлади.**



Тарбия ҳақидаги улуг китоб


Алишер Навоий, аввало, инсоннинг яратилиши, моҳияти, унинг табиат ва жамиятдаги ўрни, хизмати ҳақида тўхталар экан, бу масалага ечимни Қуръони каримдан қидиради. Инсон яралишидан мақсад ва унга юкланган масъулият ҳақида тафаккур қилишга ундайди. Шунинг учун инсон энг олдин яратган Зотни таниб олмоғи, ақидасини тўғрилаб олиши тавсия этилади. Бу эса унинг тўғри йўлдан юриши, бузук таълимот ва фояларга берилмаслигини таъминлайди:

*Маърифатинг ким қила олмай сифат,
Қилдинг ани орифи ул маърифат.
Илмиға ҳар зотни хайлай алладинг,
Зотиға оламни туфайл алладинг.*

Инсон ўзини йўқлик оламидан бу оламга келтирган Зотни яқиндан таниб олса, жаҳолат ва гумроҳлик сари юз тутмайди. Ҳамма бало ва мусибатларнинг бошли ана шу танимаслик билан боғлиқдир. Навоий инсонни “олам ичидаги олам” деб улуғлайди, унинг мартабаси бошқа жонзор ва маҳлукларнидан юқори туришини, ўзи ҳам шунга яраша амал қилишини тушуниди. Одоб-ахлоқи билан инсон ўзининг ҳақиқий мартаба-мақомига кўтарилар экан, бадхулқ ва жоҳил одамни бу мақомга муносиб деб бўлмайди. Бироқ одам кўрки ва зийнати ҳисобланган ахлоқий фазилатлар шариатнинг чегарасидан четга чиқмаса, янада гўзал маъно касб этади:

*Ҳар неким ул шаръдин этиб удул,
Эрмас адаб айласанг они қабул.*

“Ҳайратул аброр” достонидаги панд-насиҳатга йўғрилган бобларни кўздан кечирадиган бўлсақ, имон, карам, адаб, қаноат, вафо, ростгўйлик, илм каби инсоний хислат ва фазилатларга алоҳида боблар бағишланиб, шеърий ифода ва талқинлар билан йўғрилгани ўқувчиларга маънавий завқ



беради. “Ҳайратул аброр” достони чинакам тарбия ва ҳаёт ҳақиқатини танишда ўзига хос бадиият маҳсулидир.

Алишер Навоий мазкур достоннинг 32-бобида жоҳу насаб ва ҳаёву адабни бирбирига қиёслаб бундай деган:

*Элга шараф ўлмади жоҳу насаб,
Лек шараф келди ҳаёву адаб.*

Бу дунёнинг сир-синоати, жумбоқлари ва ғаройиблигига акл кўзи билан қараган одамзод тўғри ечим топади ва маънавий поклик сари йўл тутади. “Ҳайратул аброр” достони маърифий-ахлоқий асар сифатида ўқувчига маънавий адаб дурларни улашиб, тавҳид ва Аллоҳни таниш ҳақида динимиз таълимотидан ақидавий сабоқлар беради:

*Бўлмас адабсиз кишилар аржуманд,
Паст этар ул хайлни чархи баланд.*

Алишер Навоий ортиқча кулги ва ҳазилмазах туфайли киши исломий одоб-ахлоқ меъёрларидан четга чиқишини бадиий ифода ва гўзал ташбеҳлар орқали чизиб берадики, ўқувчи уни ўқиганда бу ишдан тийилидади:

*Тарки адабдин бири кулги дурур,
Кулги адаб таркига белгу дурур.
Қаҳқаҳадин кабк наво келтуруб,
Бошиға ул кулги бало келтуруб.
Ғунча кулуб бўлди очилмоқ анга,
Етти очилмоғида сочилмоқ анга.*

Барқни кулги йиқибон төр аро,
Балки қилиб ер қүйи тупроқ аро.
Сұбҳки бұ шева писанд айлабон,
Меҳр ўти дуррини сипанд айлабон.
Күлгікү үз ҳаддидин ўлди йироқ,
Йиғламоқ андин күп эрур яхшироқ.

Ислом адиларидан бири Абул Ҳасан Мовардий “Дунё ва дин одоби” китобида ҳазил-мазах ва кулгини ҳақларга риоя қымаслик, ҳазил-мазах қилувчи шаънига дөг тушириб, устидан кулинган кишига озор етказиш, ҳайбат, викөр ва күркемликни кетказиб, енгилтак ва аҳмоқ кишиларнинг журъатини пайдо қилиш деб баҳолайди. Умар ибн Абдулазиз: “Ҳазил-мазахдан сақланинглар. Чунки у ўртага адоват соладиган аҳмоқлиқдир”, деб огохлантиради. Донишмандлардан бири: “Ҳазил-мазах бу сўкишдир. Бунинг сўкишдан фарқи ҳазил-мазах қилувчи кулади, холос”, дейди. “Мансурул ҳикам” китобида: “Ҳазил-мазах олов ўтинни кул қилганидек ҳайбатдан айиради”, дейилган.

Шулардан хулоса чиқарадиган бўлсак, Алишер Навоий кулги ва ҳазил-мазах кабилар ўз меъёридан ошадиган бўлса, яхшиликка олиб бормаслигини, аввало, ўз эгасини чақмоқни ерга йиққандек йиқишини, фунча каби шамолда сочилишини ва каклик каби овчига ўлжа бўлишини ҳаётий мисоллар орқали чизиб кўрсатади. Бу эса ўқувчи қалбига таъсир қилиб, ўзини ислоҳ қилиши ва хулқини тузатишга ундейди.

Хозирги кунда оммавий интернет тармоқларида беадаблик, шарм-ҳаё ва тарбиядан йироқ маълумотлар шу қадар авж олиб бормоқдаки, уларни кўришга ё айтилган сўзларни эшлишишга чидаб бўлмайди.

Алишер Навоий айтганидек, адабсиз ва уяти йўқ кишилар ҳеч қачон азизу мукаррам бўлмайди. Афсуски, улар бу ўѓитни яхши билмайди ёки мағзини чақиб олмаган, ўз фойдаси учун ўйлаб кўрмаган. “Хамса” китоби ишқ-муҳаббат достони бўлиб қолмай, биринчи навбатда тарбия ва адаб берувчи улуғ китоб эканини унтишишга асло ҳаққимиз йўқ.

Бобомурод ЭРАЛИ,
Алишер Навоий номидаги
Адабиёт музейи тадқиқотчisi



Алишер НАВОИЙ

Айлама

Ё Раб, ул юзни даме кўзумга
пинҳон айлама,
Ё кўзимни ондин ўзга юзга
ҳайрон айлама.

Чехрасига мезбон ўлсун кўзум,
ул чехрани
Кўзларим уйидин ўзга уйга
меҳмон айлама.

Очмайин зулфи паришон кўнглума
чектирма оҳ,
Етмайин оҳим ели зулфин
паришон айлама.

Жонима лаълидин ўзга лаълдин
берма ҳаёт,
Лаълиға¹ жонимдин ўзга жонни
қурбон айлама.

Бошима қўйидин ўзга қўйни
қилма ватан,
Кўйида бошимдин ўзга бошни
ғалтон² айлама.

Эй қўнгул, давр аҳлидин минг
йилчилик ўйл гўша тут,
Ё алардин етса юз минг ғусса
афғон айлама.

Истасанг, эй ғул, Навоидек хуш
илҳом булбуле,
Гунчадек қўнглин маломат
хоридин қон айлама.

¹ Ләъл – оби ҳаёт, ишқ суви.

² Ғалтон – овора, саргардан бўлиш.

Қироат услубларининг фарқли жиҳатлари

Мусулмонлар
Мадинаға кўчиб ўтишгач,
кўплаб араб қабилалари
Исломга кира бош-
лади. Янги мусулмон
бўлганларнинг Қуръон
ўрганишларида маълум
қийинчиликлар юзага
кела бошлади. Ўзлари
ўргангандан лаҳжаларига
зид равишда Қуръон
калималарини талаф-
фуз қилишда уларга
машақат пайдо қилди.

Шу боис Пайғамбаримиз соллаллоҳу алайҳи ва саллам Аллоҳ таолодан улар учун енгиллик беришини сўраб илтижо қилдилар. У зотнинг дуолари сабаб Аллоҳ таолонинг азалий иродаси юзага чиқди: Қуръони каримни бир неча ҳарфда ўқишига ижозат бўлди.

Ибн Аббос розийаллоҳу анҳу- модан ривоят қилинади. Набий соллаллоҳу алайҳи ва саллам: “Жаброил менга бир ҳарфда қироат қилдирди. Мен унга му- рожаат қилиб, зиёда этишини сўрайвердим, у зиёда қилиб бораверди, ниҳоят, етти ҳарфгача етди”, дедилар (Имом Бухорий ва Имом Муслим ривояти).

Набий соллаллоҳу алайҳи ва салламнинг даврларида саҳобалар орасидан Қуръон қироатида моҳирлар, энг пешқадамлар етишиб чиқди. Жумладан, Убай ибн Каъб, Абдуллоҳ Ибн Масъуд, Зайд ибн Собит, Абу Мусо Ашъарий, Усмон ва Али розийаллоҳу анҳум ана шундай саҳобалардан эди.



Булардан ташқари, яна бир қанча саҳобалар Қуръон қориси ўлароқ ном чиқарган.

Набий алайҳиссалом вафот этганларидан кейин саҳобалар Пайғамбаримиздан таълим олган сура ва оятларни ўзлари ўргангандай кейинги авлодга, яъни тобеинларга етказдилар. Улар орасида Қуръон қироатини ўрганишга бел боғлаган кишилар ажралиб чиқдилар. Мана шу аснода секин-аста қироат мадрасалари шакллана бошлади. Шу билан бирга, қироат мазҳаблари ҳам юзага чиқиб, айрим устозлар маълум бир усулда ўқишиш ва ўқитишиш билан танилдилар. Улар саҳобалардан олган таълимотларини тартибга солиб, услугбларини бирлаштира бошладилар. Натижада уларнинг ҳар бирида ўзига хос қироат услуги пайдо бўлди.

Ислом таълимотига оид барча илмларда бўлгани каби қироат илмида ҳам маҳсус йўналишлар ва услугблар бор. Ушбу илмда ўн мутавотир йўналиш, яъни қироат услуги бўлиб, буларнинг барчаси Расулуллоҳ соллаллоҳу алайҳи ва салламдан то ҳозирги кунимизгача бирор-бир узилишсиз, мутавотир йўл билан бизгача етиб келган.

Ҳар бир қироат имомининг икки нафардан энг машҳур ровийси, яъни энг ишончли шо-

гирдлари бор. Ўн қироат имоми ва уларнинг ровийлари ўртасида, шариат илмларида бўлгани каби, ўзига хос фарқли жиҳатлар кўзга ташланади.

Мисол учун, кўплаб Ислом діёrlарида тиловат қилинадиган Имом Осим қироати соҳибининг икки машҳур ровийиси Имом Ҳафс ва Имом Шўъбадир. Имом Осимнинг ушбу икки ровийиси ўртасида бир қанча фарқли ўринлар бор. Бақара сураси 85-ояти сўнгидаги يَعْمَلُونَ کалимасини Имом Шўъба تَعْمَلُونَ қилиб, муҳотаб сийғасида, яъни калиманинг аввалидаги ى ҳарфини ت ҳарфига алмаштириб ўқиган. Ҳафс ва Шўъбанинг қироатида бунга ўхшаш фарқлиликларни учратиш мумкин.

Қолган тўққиз қироат имомлари ва уларнинг ровийлари орасида ҳам фарқли жиҳатлар бор. Қироат илмидаги бундай хилофлар Қуръони каримдан ирода қилинган асл маъно-мазмунга таъсир қиласа-да, калималарнинг зоҳирий кўриниши ва талаффузи ўзгариши мумкин.

Шариат илмларида бўлгани каби бир киши Қуръон қироатини ўрганишда бир қироатда ўқидими, умрининг охиригача ўша қироатда Қуръон тиловат қилиши шарт эмас. Балки Қуръон ҳофизи қироат илмида етук илмга эга бўлса, Қуръони каримни хоҳласа, Имом Осим қироатида, хоҳласа, Имом Нофеъ қироатида, агар қодир бўлса, қолган барча қироатларда тиловат қилиши мумкин. Лекин қироат илмида мукаммал илмга эга бўлмаган қорилар устозларидан таълим олган қироат услубидагина Қуръон ўқишлиари лозим.

Абдураззоқ ИСАҚОВ,
ЎзХИА 2-босқич магистранти



Дунё тан олган МУТАФАККИР

Шоҳ ва шоир сифатида нафақат ўзбек халқи, балки дунё тарихида муҳим ўрин туттган етук зот Захириддин Муҳаммад Бобур Темурийлар сулоласининг вакили сифатида 12 ёшида таҳтга ўтири.

Орадан вақтлар ўтиб, у дунё тан олган бир сулолага асос солди. 300 йил Ҳиндистон тупроғига осойишталиқ, тараққиёт олиб кирган Бобурийлар сулоласи ҳазрат Бобурнинг мутафаккир шоҳ бўлгани сабаб, сулола асосини тўғри белгилаб бера олгани боис узоқ йиллар ўзга юртда ҳукм суро олди.

Захириддиннинг болалиги Андижонда сарой мухитида ҳар тарафлама яхши тарбия топиш билан ўтди. “Бобур”, яъни шер, йўлбарс лақабини олишига шерюрак ва ботирлиги сабаб эди. Амир Темур салтанатини қайта тиклаш ниятида машаққатли курашларга бел боғлаган Бобур бу улуғ ниятига эришолмади. Ҳамма нарсага эга бўлган шоҳ ва шоирнинг Ватандан олисдалиги катта армони эди.

Бобур Ҳиндистондаги кўплаб хурофотлар, жумладан, эри ўлган аёлни тириклайн эрига кўшиб ёқишидай жирканч ишга барҳам берди. Эзгу ишлар қилгани учун ҳинд халқи Бобурни ардоқлади. Бобурийлар тарихини ўз тарихининг чиройли, дилбар саҳифалари деб билди, билади. Захириддин Муҳаммад Бобур хаётининг талотўпаридан ортиб, илм, бадиий ижод билан шуғулана олди.

Ҳарб ишига доир китоблар ёзди. “Мухтасар” асари аруз илмига бағишиланган. Иккита шеърий девонга тартиб берди. Икки тилда битилган 400 дан ортиқ гўзал ашъорни бизга мерос қолдириди. “Бобурнома” эса етук саркарда, шоҳ ва шоирнинг хаётномаси дейиш мумкин.

Салоҳиддин ГАДОЕВ,
Бухоро шаҳри “Хоҷса Исмат Бухорий” жоме
масжиди имом-хатиби

Ўзингдан бир сифат устун билан юр...

Воқеа сурасини ўқиб...

Абдуллоҳ ибн Масъуддан бир ҳадис етар,
Воқеа сурасин ўқинг эрта-кеч.
Расулуллоҳ сўзин бизга эслатар,
“Фақирик юзини кўрмагайсиз ҳеч”.

Қизиқдим, ўқидим Қуръон сурасин,
“Воқеа” – қиёмат, титроқ кунидир.
Ким ундан бехабар, албат, сўрасин,
Қиёмат банданинг сўроқ кунидир.

...Ер қаттиқ ларзага келар, ёрилиб,
Тоғлар тўзғиб кетар ғубор, чанг бўлиб.
Ўлганлар гўридан чиқар тирилиб,
Аллоҳ хузурида турар жам бўлиб.

Одамлар ўнг ва чап томон айрилар,
Ўнг томон жаннатдан бўлади нишон.
Кимгаки китоби чапдан берилур,
Ул банда дўзахга тушар, ал-омон...



Одам бўлиб яшайлик

Кўп гапирган одамдан сайроқи булбул яхши,
Иффати йўқ гўзалдан тикони бор гул яхши,
Диёнатли инсонлар башариятнинг нақши,
Аллоҳ берган умрни бекорга ўтказмайлик,
Омонат бу дунёда одам бўлиб яшайлик.

Гоҳида баҳорнинг ҳам қаҳри қишдек бўлади,
Ўтказган умримиз ҳам худди тушдек бўлади,
Қилинган яхшиликлар семурғ қущдек бўлади,
Аллоҳ берган умрни савобга бағишлайлик,
Омонат бу дунёда одам бўлиб яшайлик.

Омонатга хиёнат бу – гуноҳнинг каттаси,
Лафз қилиб бажармаслик номардларнинг ҳийласи,
Қарз олиб қайтармаслик – осий банданинг нафси,
Хиёнаткор лафзсизни бу йўлдан қайтарайлик,
Омонат бу дунёда одам бўлиб яшайлик.

Шермуҳаммад, ҳар қандай балолардан огоҳ бўл,
Ўз йўлингда учраган номардлардан йироқ бўл,
Ер остига киравсан, ки ҳозирдан тупроқ бўл,
Дўстларим, уйғоқликни ҳеч қаҷон йўқотмайлик,
Омонат бу дунёда одам бўлиб яшайлик.

Шермуҳаммад ОЛИМ,
Каттақўғон тумани

Хурмозор, бананзор, мевалар сархил –
Жаннат аҳли учун абадий ҳаёт.
Билинг, жаннатда ҳам даража ҳар хил,
Аллоҳ, деб эгилган хушнуд баоят.

Жаҳаннам – дўзахда шиддатли олов,
Гуноҳкор, осийлар унга мустаҳиқ.
Заққум дараҳтининг меваси “сийлов”,
Ортидан – қайноқ сув, ўзга ютум йўқ.

Ўқидим, юрагим ёрилди тамом,
Мен кимман, гуноҳга ботган бир осий.
Аллоҳим, кечмасанг, куйдим батамом,
Рахимсан, афвингга кўргин муносиб.

Эзгу амалларим не тонг кам бўлди,
Нафсимга эрк бериб яшадим доим.
Қилмишларим ўйлаб, бошим ҳам бўлди,
Ўзингга ёлвордим, раҳм эт, Худойим!

Яхшибой ШАРИПОВ,
Нурота тумани



Китоб ўқисанг

Элингга, Ватанга хизмат қилурсан,
Ўзингга яраша савоб олурсан,
Сўзлаган сўзингга маъно берурсан,
Илм ўрганиб, эй дўст, китоб ўқисанг.

Ҳалол-ҳаромларнинг фарқин билурсан,
Камбағал, қашишоққа ёрдам қилурсан,
Ёлғонмас, доимо тўғрисин дерсан,
Илм ўрганиб, эй дўст, китоб ўқисанг.

Аллоҳнинг амрини яхши билурсан,
Инсонлар ичида доно бўлурсан,
Ишингда, сўзингда олға борурсан,
Илм ўрганиб, эй дўст, китоб ўқисанг.

Яхши хислатларинг Аллоҳга ёқар,
Ким кўрса, ҳавас-ла термилар, боқар,
Аё Рустам, кунда ҳикматлар уқар,
Илм ўрганиб, эй дўст, китоб ўқисанг.

Рустам ХЎЖАҚУЛОВ,
Нуробод шаҳри



Фаровонлик истасак...

Хеч қачон бўлган эмас ҳаёт йўли текис, равон,
Юради тўхтамасдан, қоқинса-да ҳар карвон,
Хеч кимса юра олмас оқимга қарши томон,
Зиддиятлар кўп бўлур, юракда қолур армон,
Фаровонлик истасак, ҳадисда бордир дармон.

Одамлар яшамоқда бу йўлда фароғатда,
Курашиб, меҳнат қилиб, ғурурли, шижоатда,
Хатолик дилни бузгай, қолурлар маломатда,
Икки банда тўқнашиб, қолурлар қабоҳатда,
Фаровонлик истасак, ҳадисда бордир дармон.

Биродарлар ўртасида чиқиб қолса адоват,
Ўртани ислоҳ қилиш – энг хайрли саодат,
Адоват хавфи бўлса, ислоҳ қилиш матонат,
Бу Аллоҳнинг амридири, бефарқликка йўқ тоқат,
Фаровонлик истасак, ҳадисда бордир дармон.

Зардобдир юрак доғи, гина қолур урушдан,
Азоб беради жонга, безор бўлиб турмушдан,
Ўзини ўзи ейди, ҳаловат йўқ юришдан,
Эй тингловчи, фикр қил, яхшилик топ ҳар ишдан,
Фаровонлик истасак, ҳадисда бордир дармон.

Аҳмаджон МАМАСАИДОВ,
Учқўприк тумани



Тўртликлар

* * *

Деманг, дунё ғурбатлардан иборат,
Фисқу фужур, ғийбатлардан иборат.
Ўзлигини англаб етган инсонга
Дунё дилкаш сухбатлардан иборат.

* * *

Ёлғизлик фақат Яратганга ярашар,
Ҳаётда ҳамроҳинг, дўстинг билан юр.
Ҳамроҳнинг кимлиги кўп муҳим, билсанг,
Ўзингдан бир сифат устун билан юр...

* * *

Дунёни англаймиз ёш ўтган сайин,
Борар манзилимиз ясатиқ тайин.
Навбат қачон келишин билсайдик агар,
Инсоф-ла ушлардик тарози шайин.

Қалам ва қофоз

Оlamda ҳар нарса Аллоҳнинг мулки,
Тарихни варақла, фикр айла бироз.
Олдиндан яралган нарсалар неки –
Мен дейман, қадимдир қалам ва қофоз.

Қофозга беҳуда чалпима сиёҳ,
Хўрлама қофозни, раҳм айла бироз.
Ҳарф ҳам ғойибидан, қилма ишишибоҳ,
Мен дейман, қадимдир қалам ва қофоз.

Шоирнинг қўлида мевали дарахт,
Гўё олча каби гуллайди қийғос...
Ҳар бир битигингни ўйлаб ёз ва айт,
Мен дейман, қадимдир қалам ва қофоз.

Тарихчи қўлида маёқдир қалам,
Ёзиб қолдиради, ким эгик, ким ғоз...
Қачонлар етмишдир қанчалар ситам...
Мен дейман, қадимдир қалам ва қофоз.

Иғвогар қўлига тушганда қалам,
Тақдирлар ёниши мумкиндир нохос.
Унда гоҳ қайғу, гоҳ шодлик мужассам,
Мен дейман, қадимдир қалам ва қофоз.

Номай аъмолинг ёзилар ҳар кун,
Икки котиб малак тинмайди бироз...
Яратган лутф қилсин хайрли якун,
Мен дейман, қадимдир қалам ва қофоз.

Мурсалим ОБИДОВ,
Касби тумани

* * *

Одамлар ажралган яхши-ёмонга,
Ёмонлар мослашган ёлғон замонга.
Бунда яхшилар рост дунё ахтариб,
Билишмас боришин қайси томонга.

* * *

Тўрт томон ноҳақлик дегандан кўра,
Ўзинг тўғримисан, қалбингдан сўра.
Нафс ғолиб жойларда қачон ҳақ бўлган,
Иймонинг бут бўлса, ҳақ шу-да, жўра.

* * *

Ҳаётда тўғри бўл, ҳамиша, ҳар он,
Вужудингда оқиб турсин тоза қон.
Дилингда Ҳақ бўлсин, тилингда иймон,
Шунда нажот топар бу омонат жон.

Исматулла МАМАНОВ,
Тошкент шаҳри

Тарихи Мұхаммадий

(Давоми. Бошланиши ўтган сонларда.)

БАДР ҒАЗОТИ

Сүнгра Расулуллоҳ Бадрдаги сув қудукларини душмандин илгарироқ әгаллашучун илдамлаб йўлга тушдилар. Айтгандаридек, Қурайшдан илгарироқ манзилга етиб, Мадина томонидин борищдаги биринчи кудук бошига тушдилар. Анда Ансор сахобаларидин Ҳубоб ибн Мунзир деган киши:

– Ё Расулуллоҳ, бу жойга агар сизни Аллоҳ туширган бўлса, бу ердан илгарикийин кетмагимиз йўқдур. Агар бу жойга ўз фикрингизча тушган бўлиб, урушда хийла керак десангиз, бу ўрин бизга қулай эмас, – дедилар. Анда Пайғамбаримиз:

– Бу ҳақда менга Аллоҳдин вахий келмади, ўз хохишимча бу жойга тушдим. Уруш демак, макр-ҳийла билан бўлур. Агар биз учун бирор фойдали иш топган бўлсанг, қани, сўзла, уни қабул қилурмиз, – дедилар. Анда Ҳубоб ибн Мунзир:

– Андоқ эрса, Макка томонидаги энг олдинги биринчи қудукқа эга бўлмоғимиз керакдур. Мен билурман, ё Расулуллоҳ, бу жойдаги борлик қудуклардан унинг суви мўлдур. У қудукнинг ёнидан кўл қазиб, уни сув билан тўлдириб олайлик. Қолмиш қудукларнинг барига тош-тупроқлар ташлаб, сувларини қуритайлик, душманларимиз келса, сувсиз қолсунлар, – деди.

Расулуллоҳ бу кенгашни тўғри топиб, бу қудук айланасида аскарга ўрин олдилар. Бошқа қудукларнинг барини кўмдириб, ўз қудуклари олдида бир кўл қазиб, сувга тўлдирилар. Бу ўринга душман келиб етмасдин илгарироқ бу ишлар бажарилган эди. Анда мадиналиқ ансор сахобалар радиси Саъд ибн Муъоз:

– Ё Расуаллоҳ, сиз учун бу тепа устида соялик бир ўрин қилайлик, бизнинг ишларимизни текшириб, сиз унда ўлтиринг.

Югурук тиялардин бир нечасини олдингизга келтириб қўяйлик, сўнгра биз душманларимиз билан савашайлик. Тангри бизга ёрдам бериб ғанимларимизни енгар бўлсак, кутган тилагимизни топган бўлурмиз. Агар бундоқ бўлмай, иш бошқага айланса, тайёр турган тияга миниб, ўзингизни Мадинага еткуринг. Анда қолдирмиш ёр-йўлдошларингиз сизни жонлари ила сақлагайлар. Олдингизда сиз учун мол-жонларини қурбон қилгайлар. Бу ишда уларнинг биздан ҳеч камчиликлари йўқдур, – деди. Расулуллоҳ унинг бу сўзига раҳмат айтиб:

– Эй Саъд! Иш ўзгармас, иншоаллоҳ, биз душманларимизни енгамиз, – дедилар.

Шунинг билан уруш майдони устида қараб тургудек бир эгиз тепа устига хурмо ёғочи шохларидан соябон ясадилар. Расулуллоҳ ул жойга чиқиб ўлтирилар.

Шу орада Қурайш қўшинлари ҳам етишиб келди. Расулуллоҳ кўрдиларким, аларнинг уруш асбоблари тугал, отарғумоқлари мукаммал. Байроқлар кўтаришган ҳолда ғурурлик ва тақаббурлик билан келишар эдилар. Ўз ёронлари, мўминларга қарасалар, буларда ҳар томондан етишмаслик кўп кўринди. Соnlари уч юздан ортиқ бўла туриб, борлик кўлуклари етмиш тия, икки отдан бошқа йўқ эди. Буни кўриб, Расулуллоҳнинг кўнгиллари маъюс бўлди. Сўнгра Қурайш аскарларига қараб туриб, Худога муножот қилдилар:

– Эй Бори Худоё, бутун дунё ҳалқига мени ҳақ пайғамбар қилиб юбординг, ҳақ йўлни аларга ўргатгил деб, қўлимга Қуръондек улуғ китоб бердинг. Энди булар ўзингга қаршилик кўрсатиб, пайғамбарингни ёлғончи қилдилар. Ўзинг туширган Қуръони каримга ишонмадилар, қонимизга ташна бўлиб, қаршимизга келдилар. Эй Бори Худоё, бу урушда бизларга зафар бериб, душманларимизни ҳалок қилгил, чунки урушда сабр этган мўмин кулларингга, “Ёрдам берурман”, деб Ўзинг

ваъда қилдинг. Сенинг бу ваъданг албатта ҳақдур, – деб дуо қилдилар.

Шу орада Қурайш қўшини иккига бўлиниб, ўз ичларидан ола чиқди. Аскар радиалидан Утба ибн Рабиъа деган киши халқни бу урушдан қайтарғали турди. Ул айтур эдиким:

– Бу урушда Мұхаммадни енгар бўлсак ҳам, яна бу урушдан биз учун фойда чиқмайдур. Чунки унинг ёру йўлдошлари энг оз деганда, ўз баробарларича киши ўлдирмай қолмаслар. Агар бу урушда Қурайшдан шу қадар одам ўлдирилур бўлса, қолганларимизга бу тириклиқдан нима лаззат бўлур? Яна урушнинг охир қандоқ чиқиши бизга маълум эмасдур. Мұхаммад аскарининг бир қисми ўз қабиламиз бўлганликдан бу уруш ўз қонимизга ўзимиз қасд қилиш демакдур. Мұхаммад билан бизнинг орамизда қон-мол чиқимларимиз бўлса, барини ўз устимга олдим, қонга хун тўларман, молига товон берурман, энди бу урушни қўяйлик, Мұхаммадни бошқа қабила араблари билан қолдириб, ўзимиз эсонлик билан қайтайлик. Ул бошқаларни енгсин ёки улардин енгилсин. Биз учун бу иш фойдали бўлиб чиқар, – деди.

Бу сўзлар аскарлар ичида тарқалиб, Абу Жаҳлга етди. У эрса бутун қўшиннинг бош қўмондони эди. Бу сўзнинг тўғрилигига қонган бўлса ҳам, кўнглидаги сақлаган гина-адоватининг қаттиқлигидан бу маслаҳатни қабул қилмади. Қайта ул кишини қўрқоқлик билан айблади. Ва ҳам бундин илгарироқ карвон хабарини билиш учун Расулуллоҳ саҳобалардин саккиз кишини, Абдуллоҳ ибн Жаҳшни бош қилиб юборган эдилар. Нахла деган жойга келганларида кичикроқ карвонга учрашиб, карвон бошлиғи Амр ибн Ҳазрамий деган кишини ўлдирилар. Бутун карвон молини икки киши билан олиб, Мадинага қайтдилар. Бунинг воқеаси олдинроқда ўтди. Ўлдирилган Амр ибн Ҳазрамийнинг қасосини оламан деб Қурайш қўшини билан бирга чиқсан эди. Абу Жаҳл унга дарҳол киши юбориб, олдириб келиб:

– Кўрдингми Утбани? Укангни ўлдирган Мұхаммад билан урушмаймиз деб аскарни урушдан қайтармоқчи бўлади. Энди сен бутун аскар йиғилиб турган чоғда ўрнингдан туриб, ўлган укангни қаттиқ талаб қилиб, ўч олишга аскарни қўзғали, – деди. Сўнгра у аскар ўртасига келиб орқасини (белдан пастини) очди¹, араб одатича бошига тупроқ сочиб “Во Амро! Во Амро!” деб қаттиқ қичқириб йиғлагани турди. Буни кўриб ўз қабиласи ва қариндош-уруғлари ҳам йиғладилар. Бутун аскар “Ўч оламиз!” деб қичқиришдилар. Шунинг билан икки орадаги сўзлар тўхталиб, уруш бошланмоқчи бўлди. Ҳар икки томондаги аскарлар ўз сафларини туздилар.

Сарвари олам айтдилар:

– Икки ўринда сафни тўғри тутмоқни Аллоҳ сужур. Бири – намози жамоатда, иккинчиси – сўқиши майдонида². Расулуллоҳ ҳам қўлларидағи таёқчалари билан ишорат қилиб, илгари-кейин турган кишиларнинг сафларини тўғриламоқда эдилар. Шу орада аскар саҳобалардан Савод ибн Ғазийя номли бир киши сафдан ташқари чиқиб кетди. Унга ишорат қилсалар, ўзини ўнглай олмади. Сўнгра Пайғамбаримиз тутиб турган таёқчалари билан ул кишини “Сафда тўғри тур”, деб биқинига қаттиқроқ нуқиб қўйдилар. Ул киши айтди:

– Ё Расулаллоҳ, сизни Аллоҳ таоло халқ ичига ҳақли, адолатли ҳукм қилишга юборгандур. Менинг биқинимга туртиб, оғритдингиз. Шунинг учун қасос қайтаришингизни талаб қиласман, – деди. Анда Расулуллоҳ қорниларини очиб, қасос олмоқча рухсат қилдилар. Буни кўриб у саҳоба муборак қоринларига юз-кўзларини суртиб ўпди.

– Нега бундоқ қилурсан? – деб Расулуллоҳ андин сўрадилар. Ул киши:

– Ё Расулаллоҳ, кўриб турасиз, барчамиз ўлим олдида, ажал сафида турармиз. Агар бу урушда ўлиб кетар бўлсам, охир чоғимда муборак жасадингизга бирор жойимни суртган бўлурман. Бу эса Аллоҳ олдида менинг учун улуғ шарафдур, – деди³.

“Хасоиси суғро” деган китобда келтирубдур: “Расулуллоҳнинг муборак жасадларига жонли-жонсиз нима нарса теккан

бўлса, ул нарсани Аллоҳ таоло дўзах ўтига ҳаром қилгай”.

Шундок бўлиб, ҳар икки тараф аскарлари саф боғладилар. Баҳодирлар майдонга кўз тикдилар. Шу чоғда яна Пайғамбаримиз аскар устига келиб, уруш бошланиши олдида иккинчи ваъз сўзладиларким, мазмуни бу эди:

“Эй мўминлар! Аллоҳ таоло сизларга нусрат берурман, деб Ўзи ваъда қилди. Аллоҳ ваъдасининг ҳақлигига ҳеч шак йўқдур. Фанимлар устидан ғалаба қозонмоқ учун уруш майдонида чидамлилик керакдур. Фанимлар қаршисида баҳодирлик билан сабот қилгувчи мўминларни Аллоҳ дўст туттагай. Фаришталар аларнинг ёрдамида бўлгайлар. Бундок ўринда сабр қилиб шижаат кўрсатувчиларни Аллоҳ таоло доимий давлатга етказгай, келгувчи кунларнинг қайғу-ҳасратларидан кўнгилларини кутқазгай”.

Бу сўзга чуқур фикр қилинг. Пайғамбаримиз айтган бу ваъзларида умматларининг доимий давлатга етмакликлари, дунё турмушида ғаму қайғудан озод бўлмоқлари учун биринчи дараҷада душман устидан ғалаба қозонмоқ кераклигини очиқ кўрсатдилар. Чунки мағлубиятга учраб, душманларидан енгилган миллатлар доимий қайғу-ҳасратда қолиб, хору зорлик бирла яшамоқча мажбурдир. Ҳар бир кимсага маълумдурки, ҳаётда инсоннинг энг севган, қадрли ва қимматли тўрт нарсаси бордур. Бу тўрт нарсага эга бўлмаган кишилар инсонлик шарафидан маҳрум бўларлар.

**Алихонтўра Соғунийнинг
“Тарихи Муҳаммадий” асаридан**

Давоми бор...

¹ Жоҳилия замонидаги “Назирул-урён” одатига кўра оғир хабарга диққатни шундай шаклда жалб қилинар экан.

² Ибн Касир. Тафсир (Имом Аҳмаддан бироз фарқли ривоят қилинган).

³ Вокидий. Мағозий, 1/57.

Ибн Жавзий раҳимаҳуллоҳ ўзининг “Уйунул ҳикоёт” номли китобида келтиради: «Саҳрова яшайдиган бир кишининг эшаги, ити ва хўрози бор эди. Хўроз эрталаб уларни намозга уйғотар, ит уларни қўриқлар, эшак эса юкларини ташир эди.

Ҳар ишда хайр бор

Бир куни тулки келиб хўрозни еб қўйди. Ҳамма хафа бўлди. Хўжайнин солиҳ инсон эди. Бунда бир яхшилик бўлса керак, деб қўйди.

Бир қанча вақт ўтиб, бўри келиб эшакни ўлдириб қўйди. Бунга ҳам ниҳоятда қаттиқ хафа бўлишди. Солиҳ киши бунда ҳам бир хайр бордир, деб қўйди.

Бироз вақт ўтиб ит ҳам ўлиб қолди. Хўжайнин бунда ҳам бирор яхшилик бордир, деди.

Бир куни эрталаб уйғонишса, ўғрилар атрофдаги ҳамма қўшниларни ўлдириб, молини олиб буларга тегишимаганини қўришди. Ўғрилар ўлдирилган кишиларни итлари, эшаклари ёки бошқа ҳайвонларининг овозидан топиб келиб, молларини талаб кетишган эди. Хўжайнининг “бунда бир яхшилик бордир” дегани тўғри чиқди».

* * *

Биз инсонларнинг назаримиз чекланган, қарашларимиз чегаралидир. Мушкулотимиз шунда. Воқеанинг озгина қисмини кўра оламиз. Аммо Аллоҳ таоло ҳамма нарсани кўриб, билиб ҳикмати билан ҳукм қиласи.

Бизга ёқмайдиган ишлар воқе бўлганида, уларнинг ҳикматини билмаймиз. Аммо бироз вақтдан сўнг Аллоҳнинг ихтиёри бизнинг ихтиёrimиздан биз учун фойдалироқ бўлганини англаймиз.

Качонлардир бир мансабдан маҳрум бўлганмиз. Ризқимиз шунда деб ўйлаганмиз. Ожиз инсонмиз-да. Берк турганини билмасдан, ризқимиз шу эшиқда деб ўйлаймиз. Барча ризқ эшиклари Раззоқнинг қўлида эканини унутамиш. Бироз вақт ўтиб Раззоқнинг саховатидан хижолат бўлиб қоламиз. Шундай экан, ҳар ишда бир хайр борлигини эсдан чиқармайлик.

Абдулқодир ПОЛВОНОВ

Qarg'aning nasibasi

Kuz kunlarining birida onam tandirga non yopa boshladi. Men esa kulchaning pishishini kutib, tandir atrofida uymalashardim. Shu choq yong'oq daraxtidan ikki dona mevasi yonimga kelib tushdi. Qarg'aning "qar-qar" deganini eshitdim. Menimcha, u cho'qib uzgan yong'oqlar unga nasib etmagan edi.

- Mana yong'oqlaring, ol!
- deb osmonga qaraganimda qarg'aning allaqachon olislarga uchib ketganini ko'rdim. Nima qilishni bilmay qoldim, qo'limda qarg'aning yemishi turardi. "Qaytib kelarmikin?" deya bir onamga, bir osmonga qaradim.

Qizara boshlagan nonlarga suv sepayotgan onam qo'z qiri bilan qaradi-da: .

- Sen g'am yema, qarg'ani yaratgan Egam uning rizqini ham beradi. Chunki Qur'oni karimda:

وَمَا مِنْ دَابَّةٍ فِي الْأَرْضِ إِلَّا
عَلَى اللَّهِ رُزْقُهَا

"Yerda o'rmalovchi biror narsa (jonzot) yo'qli, uning rizqi (ta'minoti) Allohning zimmasida bo'lmasa!" deyilgan. Yong'oqni o'zing yeyaver, bolam! – dedi.

- Yo'q, oyijon! U ertaga ertalab yana qaytib keladi, – dedim bilag'onlik qilib. Onam hech narsa demasdan jilmaydi.

Yong'oqlarni cho'ntagimga solib qo'ydim. Ertasiga barvaqt turib, qarg'ani kuta boshladim. Qushdan darak bo'lmasdi. Xullas, uni har kuni kutadigan bo'ldim.

Shu-shu qarg'a uyimizning atrofidan qaytib uchib o'tmadni. Yong'oqni hech kimga ishonmasdim. Oradan bir necha kun o'tdi. Hatto xastalanib qoldim. Meni ko'rgan onam:

- Yong'oqni erta bahor ekib qo'ysang, daraxt unib-o'sadi. Mevaga kirgach, sen kutayotgan qarg'a ham yong'oq daraxtiga uchib keladi! Bu ishing bilan katta savobga ham ega bo'lasan. Chunki Payg'ambarimiz alayhissalom: "**Agar qiyomat bo'lib qolsa va birontangizning qo'lida xurmo daraxti bo'lsa, bas, uni ekib olsin**" (Imom Buxoriy rivoyati), deya nasihat qilganlar.

Erta bahorda ona-bola yong'oqlarni ekdisi. Har kuni tongda unib chiqqan yosh niholchalarni sug'orishni odat qildim. Vaqt yetib, darvozamiz oldida ikkita yong'oq daraxti ko'kka bo'y cho'zdi.

- Yillarni quvib, yillar o'tdi. Men ham biroz ulg'aydim. Ikki dona yong'oq voqeasi ham unutildi. Bir kuni tushlik qilayotganimda qarg'alarning "qar-qar" degan ovozini eshitib qoldim. Qarasam, yong'oqning shoxida bir gala qarg'alar. Juda ham quvonib, Allohning qudratiga hamdlar aytdim...

Fazliddin ABDUNAZAROV





Фижилик мусулмонлар

Фижи Суверен Демократик Республикаси – Тинч океанининг жанубифарбий қисмида, Фижи оролларида жойлашган давлат. Майдони 18,4 минг км². Аҳолиси бир миллион атрофидан. Пойтахти – Сува шаҳри. Маъмурий жиҳатдан 4 округга бўлинади.

Мазкур мамлакатга мусулмонлар 1879 йилдан кириб кела бошлаган. Айни пайтда Фижи минтақадаги энг катта мусулмон жамиятига эга бўлиб, бу жамоа аъзолари ҳатто Австралия ва Янги Зеландия мусулмонларидан ҳам кўп. Мамлакатда масжид ва мадрасалар талайгина. Кўплаб ороллардан ташкил топган ўлканинг 6,3 фоиз аҳолиси мусулмонлардир.

Бу юрга дастлаб ҳиндистонлик мусулмонлар ёлланма ишчи сифатида кела бошлаган. Бу жараён 1916 йилгача давом этган.

1884 йилдан бошлаб мамлакатнинг турили ҳудудларида мусулмонлар қўпайган. Қийинчиликларга қарамай, мусулмонлар ўз динларига содиқ қолишади. Бу жараёнда улар ҳамжиҳатликда ҳаракат қиласидилар.

1894 йилда Навуа мусулмонлари Қурбон ҳайитини муносиб нишонлашди. 1902 йилда Лабасда масжид қурилди. 1909 йилда мусулмонлар маориф комиссиясига болаларига араб ёзувига асосланган ҳолда урду тилида дарс берилиши ҳақида

талаб қўйишиди. Бу ҳолат мамлакатда Исломнинг ўзини намоён этишининг муҳим босқичларидан бири эди. Ҳозирги кунда мактабларда урду тили ўқитилади.

1926 йилда Фижи мусулмонлар лигаси (*FML*) ташкил этилди. *FML*нинг Таъсис қурултойи мамлакат пойтахти Сува шаҳрида бўлиб ўтди. Ташкилотнинг биринчи президенти уддабурон тадбиркор Абдул-Азиз Хон эди. *FML*нинг энг муҳим вазифаларидан бири мусулмонларнинг таълим сифатини ошириш эди.

Бугунги кунда ташкилот тасарруфида 26 та филиал, 17 та бошланғич, 5 та ўрта мактаб, шу билан бирга, минтақадаги бошқа мамлакатлар, хусусан, Тонга ва Фарбий Самоа мусулмон жамоалари вакиллари иштирок этадиган олий ўқув юрти (*Тинч океан ислом институти*) бор.

Фижи мусулмонлари бутун Тинч океани минтақасида Исломнинг таянчи ҳисобланади. Баъзи маҳаллий фижиликлар ҳам *FML*нинг Исломга чақириғига жавоб беришиди ва мусулмонлар сафидан жой олишди. Умуман, айтиш мумкинки, Фижи Республикасидаги мусулмонлар бирдамликни сақлаб, замоннинг синовларидан муваффақиятли ўтиб келишмоқда.

Дамин ЖУМАҚУЛ
тайёрлади.